

清

史

稿

清史稿

列傳九十四

尹繼善

劉於義

陳大受

張允隨

陳宏謀

尹繼善字元長章佳氏滿洲鑲黃旗人大學士尹秦子雍正元年進士改庶吉士授編修五年遷侍講尋署戶部郎中上遣通政使留保等如廣東按布政使官達按察使方顯瑛受賕狀以尹繼善借勘實卽以尹繼善署按察使六年授內閣侍讀學士協理江南河務是秋署江蘇巡撫七年真除疏禁收漕規費定石米費六分半給旗丁半給州縣使無不足然後裁以法平糶盈餘非公家之利應存縣庫常平倉捐穀聽民樂輸不得隨漕勒徵命如議行又疏請崇明增設巡道兼轄太倉通州並釐定永興牛羊大安諸沙分防將吏福山增隸沙船與京口狼山諸汛會哨又請移按察使駐蘇州蘇松道駐上海皆從之旋署河道總督九年署兩江總督十年協辦江甯將軍兼理兩淮鹽政疏言鎮江水兵

駐高資港江軍水兵駐省會各增置將吏狼山復設趕緝大船與鎮江江軍水兵每月出巡察庶長江數千里聲勢聯絡上嘉之尹繼善請清察江蘇積欠田賦上遣侍郎彭維新等助爲料理又命浙江總督李衛與其事察出康熙五十一年至雍正四年都計積虧一千一萬上命分別吏蝕民欠逐年帶徵尹繼善等並議叙又請改三江營同知爲鹽務道並增設緝私將吏十一年調雲貴廣西總督思茅土酋刁興國爲亂總督高其倬發兵討之擒興國餘黨未解尹繼善至諮於其倬得窺要檄總兵楊國華董芳督兵深入斬其酋三及從亂者百餘元江臨安悉定分兵進攻攸樂思茅東道撫定攸樂三十六寨西道攻六岡破十五寨降八十餘寨疏聞上諭曰勦撫名雖二事恩威用豈兩端當撫者不妨明示優容當勦者亦宜顯施斬馘俾知順則利逆則害今此攻心之師卽寓將來善後之舉是乃仁術也識之十二年奏定新開苗疆諸事請移清江鎮總兵於台拱並移設同知以下官增兵設汛從之又奏雲南潯土黃河自土黃至百色袤七百四十餘里得旨嘉獎尋詔廣西仍隸廣東總督十三年奏定貴

州安籠等營制貴州苗復亂尹繼善發雲南兵並徵湖廣廣西兵策應道副將紀龍勦清平參將哈尙德收新舊黃平二城合兵徇重安副將周儀等復餘慶獲苗曾羅萬象等總兵王無黨韓勦勦八寨總兵譚行義勦鎮遠又令無黨合廣西湖南兵與行義會破苗寨斬千餘級獲苗酋阿九清等苗亂乃定乾隆元年貴州別設總督命尹繼善專督雲南二年奏豁雲南軍丁銀萬二千二百有奇入覲以父尹泰老乞留京侍養授刑部尙書兼管兵部三月丁父憂四年加太子少保五年授川陝總督郭羅克善復爲亂尹繼善檄諭番酋執爲盜者以獻車旋定六年奏陳郭羅克善後諸事請設土目打牲子號片寬積案撤戍兵上皆許之七年丁母憂八年署兩江總督協理河務疏言毛城鋪天然壩高郵三壩皆宜仍舊上諭令斟酌因時制宜九年銜入覲還上命傳旨開天然壩且曰銜奏河水小壩宜開尹繼善覆奏略言銜不問河身深淺但問河水大小非知河者也河淺壩開宜流太過湖弱不敵黃強爲害滋甚上卒用尹繼善議十年實授兩江總督十二年疏言阜寧高寶諸地圩岸分年修治務令圩外取

土挑濬成溝量留涵洞使旱澇有備鳳翔泗三屬頻遭水患河渠次第開濬而田間圩塍實與爲表裏亦陸續興修俟有成效推行遠近上諭曰此誠務本之圖實力爲之十三年入覲調兩廣未行授戶部尙書協辦大學士軍機處行走兼正藍旗滿洲都統未幾復出署川陝總督嗣以四川別設總督命專督陝甘大學士傅恆經略金川師經陝西上獎尹繼善料理臺站馬匹諸事調度得宜十四年命參贊軍務加太子太保十五年西藏不靖四川總督策楞統兵入藏命兼管川陝總督十六年復調兩江十七年尹繼善以上江頻被水疏請濬宿州睢河彭家溝泗州謝家溝虹縣汴河上游築宿州符離橋靈璧新馬橋砂礮河尾黃疇橋壑家橋詔如所請羅田民馬朝柱爲亂檄總兵牧光宗捕治並親赴天堂寨獲朝柱家屬徒黨得旨嘉獎召詣京師十八年復調署陝甘總督雍正間開哈密蔡伯什湖屯田乾隆初以畀回民貝子玉素富以屢歉收請罷尹繼善奏言從前開渠引水幾費經營回民不諳耕作頻歲歉收萬畝屯田棄之可惜請選西安兵丁子弟或招各衛民承種上聽其言調江南河道總督十九

年疏言河水挾沙而行停滯成灘有灘則水射對岸卽成險工銅浦邳睢宿虹諸地河道多灘宜遵聖祖諭於曲處取直開引河導溜歸中央借水刷沙河隄歲令加高務使穩固而青黃不接亦寓賑於工詔如議行命署兩江總督兼江蘇巡撫二十一年疏請溶洪澤湖入江道開石羊溝引東西灣兩壩所減之水疏芒稻開達董家溝引河引金灣開壩所減之水加寬廖家溝河口引壁虎鳳凰兩橋所減之水並濬各河道上游修天妃青龍白駒諸壩從之實授兩江總督二十二年疏言沛縣地最卑昭陽微山諸湖環之濟泗汶濰諸水奔注請於荆山橋外增建閘壩使湖水暢流入運又沂水自山東南入駱馬湖出廬口入運阻荆山橋出水當相度堵修上以所言中形勢嘉之旋與侍郎夢麟等會督疏治淮揚徐海支幹各河暨高寶各工是冬事竟議叙二十五年上命增設布政使尹繼善請分設江寧蘇州二布政使而移安徽布政使駐安慶二十七年上南巡命爲御前大臣二十九年授文華殿大學士仍留總督任三十年上南巡尹繼善年七十御書榜以賜召入閣兼領兵部事充上書房總師傅三十四

年兼翰林院掌院學士三十六年上東巡命留京治事四月卒贈太保發帑五千治喪令皇八子永璇奠醴永璇尹繼善皆也賜祭葬諡文端尹繼善釋褐五年卽任封疆年纔三十餘莅政明敏遇糾紛盤錯紆徐料量靡不妥貼一督雲貴三督川陝四督兩江在江南前後三十年最久民德之亦最深世宗最賞李衛鄂爾泰田文鏡嘗論尹繼善謂當學此三人尹繼善奏曰李衛臣學其勇不學其粗田文鏡臣學其勤不學其刻鄂爾泰宜學處多然臣亦不學其悞世宗不以爲忤高宗嘗謂我朝百餘年來滿洲科目中惟鄂爾泰與尹繼善爲眞知學者御製懷舊詩復及之子慶桂自有傳

劉於義字喻旂江蘇武進人康熙五十一年進士改庶吉士授編修在翰林文學甚著凡有撰擬輒稱旨雍正元年命直南書房遷中允再遷侍講督山西學政三年遷庶子上諭以留心民事歲飢無積貯奏請歲以耗羨四萬於太原平陽潞安大同買米貯倉春糶秋補上命巡撫伊都立酌量舉行四年一歲四遷擢倉務侍郎倉吏習蠶正米以購節蠶耗米抵額於義嚴出入稽餘米定數

宿弊一清七年命察燬西甯軍需八年遷吏部侍郎命與侍郎牧可登如山東
察賑並按按察史唐綬祖勅濟南知府金允彝祖邦平知縣袁舜裔虧空論如
律九年授直隸河道總督奏天津截留漕糧省津貼諸費但給地方官耗米百
之一又奏青龍灣諸地侍郎何國宗議建雞心閘十四阻水當停並請展壩面
使無礙水道均如議行擢刑部尚書仍理河務尋著直隸總督直隸盜犯依律
不分首從皆斬大名劫盜十餘案每案數十人於義以凶器祇田具贓物僅米
穀乃饑民借糧爭奪非盜奏請得末減直隸盜案視各省分首從此始十年
署陝西總督十一年授吏部尚書仍署總督累疏言甘涼爲軍需總匯糧草價
昂兵餉不敷養贍請酌借籽糧農器於瓜州諸地開墾屯種耕犁以馬代牛並
募耕夫二百教回民農事又於赤金靖逆之北泧帶湖及十八塔兒灣築城堡
爲保障安家窩鋪口別開渠供灌溉又疏請甘涼設馬廠牧長牧副視太僕寺
條例歲十一月察馬匹學生多寡爲弁兵升降賞罰均如所請行十三年命大
學士查那阿代於義領陝甘總督予於義欽差大臣關防留肅州專筭軍儲乾

隆元年奏言蘭州浮橋始于前明用二十四艘兩埠鐵纜百二十丈自有司遞減四月纜僅七十丈於是埠基闢入河心水益湍急衝潰屢見請動用帑帑改復原式庶河寬水緩以便行旅得旨允行查郎阿入覲於義仍著陝西總督二年召還京三年查郎阿劾承辦軍需道沈青崖等私運侵帑辭連於義上遣侍郎馬爾泰會查郎阿按治於義坐奪官並責償麥稞價銀三萬餘兩甘肅自康熙末至雍正初虧帑金一百六十餘萬又書散缺於義奉命察竅逮任總督部署西師往返凡四年屯田築堡安集流移輸送軍糧戰馬其勞最多以漸領過繁得過亦由此五年起署直隸布政使七年授福建巡撫疏請裁減閩鹽課外加派漳州民陳作謀蠱灣民王永興等謀爲亂道將吏捕治八年調山西召補戶部尚書九年調吏部尚書協辦大學士御史柴潮生請修治直隸水利命同直隸總督高斌勘察議濬牯牛河開白溝河支流西淀亦開支河東淀河道裁濬取直子牙河疏河口築隄界別清渾疏鳳河濬塌河淀引唐河入保定河濬正定諸泉引以溉田並修復營田舊渠閘是爲初次應舉各工十年署直隸總

督加太子太保是冬報初次工竟復議還鄉河裁灣取直築運甯河西隄挑張
青口支河新安新河拓廣利渠望都至安肅開溝並裁永定河兜灣是爲二次
應舉各工引塌河淀漲水入薊運河疏天津賈家口靜海蘆北口諸河及慶雲
馬頰河鹽山宣惠河是爲三次應舉各工又令署直隸河道總督疏請減慶雲
賦額上命減地丁十之三著爲令十二年夏報二三次工竟召還十三年二月
奏事養心殿跪久致仆遂卒賜祭葬說文恪

陳大受字占咸湖南祁陽人幼沈敏初授內則卽退習其儀旣長家貧躬耕山
麓同舍漁者夜出捕魚爲候門讀書不輟雍正十一年成進士選庶吉士乾隆
元年授編修二年大考留詹諸臣日午上御座以待大受奉先奏列第一超擢
侍讀五遷吏部侍郎四年授安徽巡撫初視事決疑獄老吏駭其精敏臚鳳穎
諸府時多盜有司多諱匿大受定限嚴緝月獲盜五十輩得旨褒美淮南北游
饑發倉穀賑之穀且盡繼以麥又告糶江南廣東且發且儲時類歲饑民掠米
麥以食有司以盜論哀其情奏原六十餘人麥熟禁躡麩造酒及大商囤積又

以高阜斜陂不宜稻麥福建安溪有旱稻名畚粟不須灌溉前總督郝玉麟得其種教民試藝有獲因令有司多購分給各州縣俾民因地種植事聞上諭曰諸凡如此留心甚慰朕懷是年調江蘇疏請飭糧道較定各州縣漕斛及先冬令民搜蠹子屢諭嘉獎並以搜蠹子法令直隸總督高斌仿行常州鎮江太倉三府州被水災發倉治賑江南舊多借堰圩塘或有久廢者被水後尤多潰敗工鉅費重民力不能勝大受出官粟借之召民興築計時而成於江浦繕三合永豐北城諸圩於句容復郭西塘黃堰蘇州太倉疏劉家河灌溉滯洩諸工畢舉七年秋黃河決古溝石林高寶興秦徐諸州縣罹其患大受馳視以聞上命截漕米協濟大受乃命多具舟候水至分載四出舳舻數百里一日而徧丹陽運河口藉潮水灌輸淤沙需疏濬大受奏定六年大修每年小修後高宗南巡御製反李白丁都護歌曰豈無疏濬方天工在人補輪年大小修往來通商賈蓋嘉其奏定歲修法利於漕運也十年有旨蠲明年天下錢糧大受疏請核準漕項科則曉諭周知彙撥地丁耗羨同漕項并完酌定菜戶減租分數通飭遊

行得旨嘉獎戶部議禁商人貯米大受謂商人貯米得少利卽散貯不過一歲
民且利焉請弛禁便又言城工核減意在節用省而工惡再修且倍之上皆
聽其言常州俗好佛家設靜堂自立名教江甯松江太倉漸染其習大受疏請
飭有司防禁移佛入廟堂內人田屋產量爲處置上諭曰此等事須實力不可
欲速不然則所謂好事不如無也十一年加太子少保調福建十二年疏言近
海商民例許往暹羅造船販米內渡時若有船無米應倍稅示罰部議從之疏
言巡臺御史巡南北二路臺澎鳳山諸羅彰化四縣具厨傳輻實往往濫准詞
訟又於額設胥役外俾奸民注籍侍符生事上命自乾隆五年起巡臺御史均
下部嚴議又疏言臺澎番民生業艱難向漢民重息稱貸子女田產每被盤折
請撥臺穀六萬石分貯諸羅彰化淡水諸縣視鳳山例接濟其不願借者聽報
可臺澎民番雜處土音非譯不通有奸民殺人賄通事移坐番罪疑之再鞠竟
得白或言海上有島十四爲田萬餘畝可開墾前政以入告大受以島地久在
禁令一旦開禁聚人既多生奸尤易設兵彈壓爲費彌甚利不敵害輒奏罷之

召授兵部尚書十三年調吏部協辦大學士軍機處行走十四年金川平晉太子太傅秋署直隸總督十五年授兩廣總督陛辭請訓上曰汝直軍機處兩年萬幾之事皆所目擊卽朕訓也何贅辭惟中外一心足矣尋命協理粵海關兩粵去京師遠吏檢民曉大受以猛治之舉劾不法吏政令大行十六年以病乞解任溫詔慰留未幾卒賜祭葬諡文肅祀賢良祠大受眉目皆上起豐稭有威清節推海內以徵時極貧祿不逮親養自奉如布衣時子輝祖自有傳

張允隨字覲臣漢軍鑲黃旗人祖一魁福建邵武知府有政績祀名宦允隨入資爲光祿寺典簿遷江南寧國同知擢雲南楚雄知府雍正元年調廣南丁母憂總督鄂爾泰等請留司銅廠二年授曲靖知府擢糧儲道鄂爾泰復薦可大任上召入見五年擢按察使未幾遷布政使雲南產銅供鑄錢寶源寶泉二局需銅急責委員領帑採洋銅洋銅不時至允隨綜銅廠事察知舊廠產尙富增其值民樂於開採舊廠復盛又開大龍湯丹諸新廠歲得銅八九百萬斤供用乃停採洋銅國帑省官累亦除八年調貴州未幾授雲南巡撫允隨官雲南久

熟知郡國利病山川險要苗夷情狀十一年思茅土酋刁興國糾徼外苦蕪蠻等爲亂蔓延數州縣尤隨興總督高其倬遣兵討之思茅圍解亂苗遁攸樂知縣章綸以事詣會城至蛟蟬村遇寇死尤隨趣兵進擒興國餘衆走臨安復擊破之尤隨疏以鎮沅思樂府縣皆新改土爲流請立學設教職定學額又疏以雲南各府州或兵少米多請以額徵秋米石折銀一兩或兵多米少請以額徵條銀兩收米一石十二年疏請於廣西府開爐鼓鑄皆下部議行十三年疏報蒙化墾田二十六頃有奇乾隆二年署雲南總督疏言雲南水利與他省不同水自山出勢若建瓴大率水高田低自上而下當潛溝渠使盤旋曲折承以木梘石槽引使溉田偶有田高水低則宜車戽又或雨後水急則宜塘蓄低道小泄水阻恐傍溢則宜疏水口使得暢流山多沙磧水發嫌迅激則宜築隄埝俾護田畝臣令有司勸修工小令於農隙按田出夫督率興作工稍大者出夫外應需工料令集士民公議需費多寡有田川水者按田定銀數借庫帑興工工畢分年還款工大非民力能勝詳情覆勘以官莊變價留充工費報聞三年請

停鑄錢運京是冬入覲四年正歲上宴廷臣賦拍梁體詩允隨與焉五年疏言
雲南鹽不敷民食安甯得洪源井試煎年獲二十一萬餘斤麗江得老姆井試
煎年獲十八萬餘斤分地行銷定爲年額上獎爲有益之事著貴州總督六年
廣東妖民黃順等遁匿貴州境有司捕得奏聞上諭曰汝不以五日京兆自居
盡心治事可嘉復著雲南總督兵部議各省有增設兵額量加裁減允隨奏雲
南昭通普洱二鎮有增設兵額地處邊要未可裁減惟有通覈合省標鎮營協
按額均減分計則兵裁無幾合計則餉省已多標鎮營協應裁兵一千一百六
十先裁餘丁四百四十八餘俟缺出停補從之允隨請濬金沙上命都統新柱
四川總督尹繼善會勘疏言金沙江發源西域入雲南經麗江鶴慶永北姚安
武定東川昭通七府至叙州入川江東川府以下南岸隸雲南北岸隸四川營
汛分布田廬相望至大井壩以上南岸尚有田廬北岸皆高山山後沙馬阿都
兩土司地從前舟楫所不至自烏蒙改流設鎮雲南兵米每歲糶自四川皆自
叙州新開灘至永嘉黃草坪五百八十里泝流而上更上自黃草坪至金沙廠

六十里商舶往來臣等相度內有未漢清凹崖三腔鑼鍋耳諸灘險惡應行修理更上自金沙廠至濫口壩二百二十七里十二灘流田壩最險次則小溜筒臣等相度開黎子河更上自雙佛灘至蜈蚣嶺十五灘相接石巨工艱臣等令改修陸路以避其險雲南地處極邊民無蓋蔽設遇水旱米價增昂今開通川道有備無患上諭曰既可開通妥協爲之以成此善舉允隨主辦其役計程千三百餘里費帑十餘萬經年而工成八年疏言大理洱海發源鶴慶瀨沮河至大理合蒼山十八溪匯而成海下自波羅甸出天生橋趨瀾滄江海袤百二十里廣二十餘里而天生橋海口寬不及丈每致倒流淹浸濱海民田臣飭將海口疏治寬深自波羅甸下達天生橋分段開濬疊石爲隄外栽茨柳爲近水州縣祛漫溢之患海口洞出山萬餘畝令附近居民承墾卽責墾戶五年一大修按田出夫合力疏濬授雲南總督兼管巡撫九年疏報東川河壩租得銅礦試煎月得銅四萬餘斤十年加太子少保十二年授雲貴總督疏言苗獠種類殊皆具人心如果撫馭得宜自不至激成事變臣嚴飭苗疆文武毋許私收濫

派並禁胥役滋擾至苗民爲亂往往由漢奸勾結臣飭有司嚴察捕治又疏言貴州思州諸府與湖南相接今有辰沅餓民百餘入貴州境採蕨而食臣已飭貴州布政使糧驛道以公使銀振濟如有納至一體散給安置諸疏上並嘉獎十五年入覲授東閣大學士兼禮部尙書加太子太保十六年卒賜祭葬諡文和

陳宏謀字汝咨廣西臨桂人爲諸生卽留心時事聞有邸報至必借觀之自題座右謂必爲世上不可少之人爲世人不能作之事雍正元年恩科世所謂春鄉秋會宏謀舉鄉試第一成進士改庶吉士授檢討四年授吏部郎中七年考選浙江道御史仍兼郎中監生舊有考職多以人代世宗知其弊令自首而州縣吏藉察訪爲民擾宏謀疏請禁將來寬既往召見徵詰再三申論甚晰乃允其奏以是知其能授揚州知府仍帶御史銜得便宜奏事丁父憂上官留之辭不許遷江南驛鹽道仍帶御史銜攝安徽布政使又丁母憂命留任因乞假歸

雍正十一年擢雲南布政使初廣西巡撫金鉉奏令廢員墾田報部以額稅抵銀

得復官報墾三十餘萬畝宏謀奏言此曹急於復官止就各州縣求有餘熟田量給工本卽作新墾田不增而賦日重民甚病之請罷前例上命雲南廣西總督尹繼善察實尹繼善請將虛墾地畝冒領工本覈實追繳乾隆元年部議再敕兩廣總督鄂彌達會銜詳勘宏謀劾銜欺公累民開捐報墾不下二十餘萬畝實未墾成一畝請盡數豁免時銜內遷刑部侍郎具疏辨上命鄂彌達會巡撫楊紀曾確勘二年宏謀復密疏極論其事高宗責宏謀不待議覆又爲是瀆奏粵人屢陳粵事恐啓鄉紳挾持朝議之漸交部議降調尋鄂彌達等會奏報墾田畝多不實請分別減豁銜以下降黜有差三年授宏謀直隸天津道五年遷江蘇按察使六年遷江甯布政使甫到官擢甘肅巡撫未行調江西九年調陝西十一年復調回江西尋又調湖北十二年川陝總督屢劾宏謀在陝西愛憎任情好自作聰明不持政體部議奪官上命留任未幾復調陝西上諭曰此汝駕輕就熟之地當秉公持重毋立異毋沾名能去此結習尙可造就也署陝甘總督十五年加兵部侍郎其冬河決陽武調河南巡撫十七年調福建十

九年復調陝西二十年調甘肅再調湖南疏劾布政使楊瀕侵扣穀價上嘉其不瞻徇論瀕罪如律二十一年又調陝西二十二年調江蘇入覲上詢及各省水災奏言皆因上游爲衆水所隨而下游無所歸宿當通局籌辦上以所言中肯緊命自河南赴江蘇循途察勘十二月遷兩廣總督諭曰宏謀籍廣西但久任封疆朕所深信且總督節制兩省專駐廣東不必迴避二十三年命以總督銜仍管江蘇巡撫加太子少傅二十四年坐督兩廣時請增撥鹽商帑本上責宏謀市恩沽名痼習未改下部議奪官命仍留任又以督屬捕蝗不力奪總督銜仍留巡撫任二十六年又以失察濬野關侵漁舞弊議罷任詔原之諭責宏謀模稜之習一成不變調撫湖南二十八年遷兵部尙書署湖廣總督仍兼巡撫召入京授吏部尙書加太子太保宏謀外任三十餘年歷行省十有二歷任二十有一蒞官無久暫必究人心風俗之得失及民間利病當興革者分條鈎考次第舉行諸州縣村莊河道繪圖懸於壁環復審視興作皆就理察吏甚嚴然所劾必擇其尤不肖者一二人使足悚衆而止學以不欺爲本與人言政輒

引之於學謂仕卽學也。蓋吾心焉而已。故所施各當人咸安之。在揚州值水災。奏請遣送飢民回籍。官給口糧。得補入賑冊。報可。鹽政令淮南於稅額外歲輸銀助國用。自雍正元年始。積數千萬。率以空數報部。及部檄移取。始追徵實。陰虧正課。宏謀奏停之。在雲南方用兵。禦夷運糧。苦道遠。改轉般遞運。民便之。增銅廠工本。聽民得窩餘銅。民爭趨之。更鑿新鑛。銅日盛。遂罷購洋銅。立義學七百餘所。令苗民得就學。教之書。刻孝經小學及所輯綱鑑大學衍義。分布各屬。其後邊人及苗民多能讀書。取科第。宏謀之教也。在天津。屢乘小舟。咨訪水利。得放淤法。水漲挾沙行導之。從隄左入。隄右出。如是者數四。沙沈土高。滄景諸州悉成沃壤。按察江蘇。設弭盜之法。重誣良之令。嚴禁淹親。棺及火葬者。在江西。歲饑。告糴於湖。廣發帑。繕城垣。築堰。堵修圩隄。開墾。以工代賑。南昌城南羅絲港爲嶺。水所趨。善衝突。建石隄捍之。左蠡朱磯。當衆水之衝。亦築隄百丈。水患以平。又以錢貴。奏請俟雲南銅解京。過九江。留五十五萬五千斤。開爐鼓鑄。並以舊設爐六。請增爐四。詔並許之。又以倉儲多虧。缺請令民捐監於本省收。

穀以一年爲限限滿上命再收一年又以民俗尙氣好訐訟請令各道按行所
屬州縣察有司自理詞訟毋使延閣滋累上命實力督率毋徒爲具文在陝西
募江浙善育蠶者導民蠶久之利漸著高原恒苦旱勸民種山薯及雜樹鑿井
二萬八千有奇造水車教民用以灌溉陝西無水道惟商州龍駒寨通漢江灘
險僅行小舟宏謀令疏鑿行旅使之又以陝西各屬常平倉多空厥亦令以捐
監納穀並請開爐鑄錢如江西例戶部撥運洋銅鑄鑿探雲南銅應用錢價以
平請修文武成康四王及周公太公陵墓卽以陵墓外餘地召租得息歲葺治
皆下部議行在河南請修太行隄又以歸德地窪下議疏商邱豐樂河古宋河
夏邑鬻河永城巴溝河民力不勝請發帑濬治既至福建歲歉米貴內地仰食
臺灣而商舶載米有定額奏弛其禁以便民又疏言福建民鬻競多訟立限月
爲稽覈以已未結案件多寡課州縣吏勤惰又言福建地狹民稠多出海爲商
年久例不准回籍請令察實內地良民或已死而妻妾子女願還里者不論年
例許其回籍從之在湖南禁洞庭濱湖民墾水爲田以寬湖流使水不爲患歲

大熟江南災奏連倉穀二十萬石濟之仍買民穀還倉再至陝西聞甘肅軍需
缺錢撥局錢二百萬貫濟餉上嘉其得大臣任事體疏請興關外水利濬赤金
靖逆柳溝安西沙州諸地泉源上命後政議行又以準噶爾旣內附請定互市
地以茶易馬充軍用詔從之其治南河大要因其故道開通淤淺俾暢流入海
督民治溝洫引水由支達幹時其蓄洩徐海諸州多棄地遇雨輒淫溢課民開
溝卽以土築圩多設涵洞爲旱潦備低地則令種蘆葦薄其賦其在江蘇尤專
意水利疏丁家溝展金灣壩濬徐六涇白茆口洩太湖水築崇明土塘禦海潮
開各屬城河又疏言蘇州向設普濟育嬰廣仁錫類諸堂收養癯獨老病並及
棄嬰請將通州崇明濱海淤灘除附近民業著聽升科餘撥入堂又通州崇明
界新漲玉心洲兩地民互爭請併撥入以息爭競上諭曰不但一舉而數善備
汝亦因此得名也及督湖廣疏言洞庭湖濱居民多築圍墾田與水爭地請多
掘水口使私圍盡成廢壤自不敢再築上諭曰宏謀此舉不爲煦嫗小惠得封
疆之體速入長吏部疏言文武官弁均有捕盜之責乃州縣捕役平時豢盜營

兵捕得就讞時任其狡展或且爲之開脫嗣後應令原獲管員會訊上嘉其所見切中事理又疏言河工辦料應令管河各道親驗加結失事例應文武分償而參游例不及應酌改置一下河督議行又言匿名揭帖循例當抵罪所告欺內有無虛實仍應按治則胥小不得逞奸有司亦知所警上亦韙之二十九年命協辦大學士三十二年授東閣大學士兼工部尙書三十四年以病請告迭諭慰留三十六年春病甚尤致仕加太子太傅食俸如故賜御用冠服命其孫刑部主事蘭森侍歸詔所經處有司在二十里內料理護行上東巡觀天津行在賜詩寵其行六月行至兗州韓莊卒於舟次年七十六命祀賢良祠賜祭葬諡文恭宏謀早歲刻苦自勵治宋五子之學宗薛瑄高攀龍內行修飭及入仕本所學以爲設施莅政必計久遠規模宏大措置審詳嘗言是非度之於己毀譽聽之於人得失安之於數禘古今嘉言懿行爲五種遺規尙名教厚風俗親切而詳備奏疏文檄亦多爲世所誦曾孫繼昌字蓮史嘉慶二十四年鄉試二十五年會試廷試俱第一授修撰歷官至江西布政使

論曰乾隆間論疆吏之賢者尹繼善與陳宏謀其最也尹繼善寬和敏達臨事恒若有餘宏謀勞心焦思不遑夙夜而民感之則同宏謀學尤醇所至憺憺民生風俗古所謂大儒之效也於義督軍儲策水利皆秩秩有條理大受剛正風吏憚之若紳明然論政重大體非苟爲苛察者比允隨鎮南疆久澤民之尤大者航金沙江障洱海去後民思與江南之懷尹繼善陳宏謀略相等懿哉

清史稿

列傳九十五

那蘇圖

楊超曾

徐士林

即王 王師

尹會一

王恕

方顯

子 林

與 允 禧

楊錫紱

潘思穎

胡寶泉

那蘇圖戴佳氏字義文滿洲鑲黃旗人康熙五十年襲拖沙喇哈番世職授藍翎侍衛雍正初四遷兵部侍郎二年出爲黑龍江將軍八年調奉天將軍乾隆元年擢兵部尚書二年調刑部授江南總督協辦吏部尚書顧琮請江浙沿海設塘堡復衛所下督撫詳議三年那蘇圖奏明沿海衛所武事廢弛我朝裁衛改營江南有金山柘林青村南匯川沙吳淞劉河諸營提督駐松江控制崇明狼山二鎮對峙海口塘汛聲勢連絡無庸復設衛所瀕海曠曩應改建者一華亭滌缺墩應增建者二柘林南門福山挑山嘴應移建者一吳淞王家嘴應修

者一劉河北七丫口並請改舊制撤牆設垛置木蓋留貯藥之屋並請城茜涇設兵崇明西南二條監河顧四房港堂沙頭港諸地下部議行江南早上命撥福建倉穀三十萬石治賑那蘇圖奏言江廣諸省買米次第運至無災州縣本年漕糧全數截留兩江不患無米福建海疆重地且不產米請留十萬石分撥災區以二十萬石運還福建上嘉其得封疆大臣之度四年詔免兩江地丁錢糧奏言向例蠲免不分貧富但富戶遇歉未傷元氣貧民素乏蓋藏多免一分卽受一分之惠請以各州縣實徵册爲據額根五錢以下者全蠲五錢以上者酌量蠲免五兩以上者無庸議蠲上諭曰卿能如此酌議如此擔當誠爲可嘉古人云有治人無治法當訪察胥役毋令因事擾民則全美矣以憂去五年授刑部尙書旋出署湖廣總督六年調兩江七年調閩浙疏裁閩省鹽場浮費場員受年節規禮以不枉法職論罪八年疏言溫台二洋漁船汛兵向有陋規總督李衛奏改塗稅稅稽曾筠又請減半徵收漁船出洋海關徵樑頭稅有司徵漁課不當復加塗稅命永遠革除九年疏言臺灣孤懸海外漳泉潮惠流民聚居

巡臺御史熊學鵬議令開荒臣思曠土久封遽行召墾恐匪徒滋事已令中止
報聞旋調兩廣十年條奏兩廣鹽政請以商欠鹽價羨餘分年帶徵商已承替
令承替者償官或侵漁令侵漁者償埠商占引地通成本斥逐另募鹽課外加
二五加一並屬私派悉行禁革又調直隸十一年條奏八旗屯田章程十二年
上東巡那蘇圖從至通州資白金萬條奏稽察山海關諸事並如所奏議行加
太子少傅十三年加太子太保授領侍衛內大臣仍留總督任那蘇圖請赴金
川軍前佐班第治事上不許十四年命暫署河道總督卒賜祭葬諡恪勤

楊超曾字孟班湖南武陵人康熙五十四年進士改庶吉士授編修雍正四年
直南書房時湖南北甬分閩命充湖北鄉試考官旋督陝西學政再遷左庶子
六年疏陳鎮安山陽商南平利紫陽石泉白河諸縣士風衰落西安漢中各屬
冒考號爲寄籍諸弊叢生請就本籍量取甯闕無濫並改寄籍者歸本籍廩增
俱作附生議行調順天學政遷侍讀學士九年擢奉天府尹疏言奉天各屬科
派多於正供造冊有費考試有費修廨宇治保甲有費長官取之州縣州縣取

之民間衙蠶里書指一派十嬰害尤劇已嚴榜所屬檄錢石禁上贖之下其奏永爲例十年疏言秋收稍歉明春米穀勢必騰貴請停商運下部議行十一年疏言州縣所收加一耗羨自錦州甯遠外俱留充州縣養廉府尹以下養廉以中江等稅羨支給部議卽以是年始著爲令內務府准御史八十條奏增錦州莊頭百戶撥民種退園地畝超會奏地給民種立業已久今增莊頭百戶戶給六百五十晌响六畝都計三十九萬畝閒民萬戶無地可耕一時斷難安輯且正值春耕清丈動需時日舊戶新莊俱不能播種本年賦必兩懸請緩俟秋收查丈事遂寢邊倉場侍郎十二年擢刑部額外侍郎仍督倉場如故旋授刑部侍郎乾隆元年署廣西巡撫二年實授疏請豁除桂林等府縣各墟及賀縣花麻地租雜稅初巡撫金鉉奏令廢員官生墾荒報捐有司因以爲利搜民間有餘熟田量給工本卽作新墾雲南布政使陳宏謀疏陳其弊下總督鄂彌達及超會屢覆會疏陳指墾不實田畝應減應豁及官生短給工本諸事上命豁加賦虛田凡數萬畝鉉及布政使張鉞皆奪官三年召授兵部尚書五年夏署兩

江總督秋授吏部尚書仍署總督疏勅江西巡撫岳濬及知府董文偉劉永錫徇情納賄遣侍郎阿里袞會江南河道總督高斌按治濬等坐譴六年疏請裁太通道揚州鹽務道以通州隸常鎮道轄餘如舊可其奏兼署安徽巡撫秋大風雨濱江海諸州縣皆被水超曾令先以本州縣所存銀米撫卹並發司庫銀八萬未被水諸州縣倉米十萬賑上江各州縣又發司庫銀十萬各縣穀百餘萬賑下江各州縣疏入上諭曰料理賑卹頗爲得宜當以至誠惻怛爲之庶可稍救災黎也通州鹽河亦以水發輟工督治水利大理寺卿汪濬副都御史德爾敏令開唐家開洩水民慮淹及麥田紛集欲罷市侍郎楊嗣瑗疏勅命超曾按其事超曾奏民無挾制阻撓情狀似可無事深究上從之復疏薦江蘇巡撫徐士林處己儉約安微巡撫陳大受虛中無滯江西巡撫包括性情和平惟吏玩民刁鮮所整頓上諭曰此至當至公之論與朕見同也尋內召視部事以父憂歸籍寔喪次病作七年卒賜祭葬諡文敏

徐士林字式儒山東文登人父農也士林幼聞鄰塾讀書聲慕之跪母前曰願

送兒入塾乃奮志勵學康熙五十二年成進士授內閣中書再遷禮部員外郎雍正五年授江南安慶知府十年擢江蘇按察使坐在安慶失察私鑄左遷福建汀漳道漳州俗好鬪殺人捕之輒聚衆據山拒或請用兵士林不可命壯丁分扼要隘三日度其食且盡遣人深入好語曰垂手出山者免如其言果逐隊出伏其仇於旁仇舉爲首者擒以徇衆慙散自此捕殺人者無敢據山拒乾隆元年遼河南布政使以父病乞歸侍旋居父喪命署江蘇布政使士林以母病父未葬辭四年命以布政使護江蘇巡撫復奏母病篤不能行是年夏詣京師高宗召對問道所經山東直隸麥收若何曰旱且萎問得雨如何曰雖雨無益問何以用人曰工獻納者雖敏非才昧是非者雖廉實益上深然之真除江蘇布政使五年湖廣遣山東流民還里道經江南恃其衆擾民士林疏言眞確災民或有田可耕或無田而佃素皆力穡時值春融自當資送復業至若游惰無業漂泊日久彼固非能耕之人亦不盡被災之民應請停資送或謂無籍窮民恐流而爲匪終年搜查遞送不得休臣未聞不爲匪於本籍獨爲匪於鄰封者

亦未聞眞爲匪者遞回本籍卽能務本力田而不復潛至鄰封者也安分則撫之犯法則懲之在地方官處置得宜而已上是其言下九卿議行秋授江蘇巡撫湖北巡撫崔紀以湖廣食准鹽自雍正元年定值遞年加增爲民累疏請核減命士林會鹽政準泰核議士林奏鹽爲民食所資貴固累民賤亦累商今確核成本每引賤價以五兩三錢餘爲率貴價以五兩七錢餘爲率商人計子母若令按本出售恐商力日絀轉運不前民亦所未便請每引酌給餘息二三錢疏下戶部議成本如所定至餘息已在成本內無庸酌給士林奏商人牟利運鹽不時至市值卽因之而長鹽政三保原議每引賤至六兩三錢餘貴至六兩五錢餘是實有餘息今臣所議已將餘息減除僅加息二三錢計售於民每斤增不過以毫計利已至薄祇以商本饒裕常年通算積少成多今不給餘息商情必生退阻倘漢口運鹽不繼恐准商困而楚民亦病也上特從之是歲徐海水災士林疏請治賑六年春復疏請酌借貧民穀麥沛縣災最重請發藩庫餘平銀糴米酌賑別疏言江蘇社穀積貯無多去年秋成惟徐海被災餘俱豐稔

臣飭諸州縣勸捐十餘萬石仍戒勿強派勿限數勿差役滋擾上深嘉之尋以病請告溫旨慰留遣醫診視又疏言淮北被水二麥無收急宜撫卹臣不敢泥成例已先飭發庫帑賑濟俟察實成災分數具題上諭曰如此料理甚副朕視民如傷之念及秋病益甚疏請乞假且言母年八十三未能迎養睽違兩載寢食靡寧上允之行至淮安卒遺疏入上諭曰士林忠孝性成以母老遠離不受妻孥之養鞠躬盡瘁遂致沈疴及得假後力疾旋里以圖侍母臨終無一語及私勸朕以憂感危明之心爲長治久安之計此等良臣方資倚任乃今溘逝朕實切切含悲不能自己者也命祀京師賢良祠賜祭葬遺疏言故父之淮母鞠氏孝養祖父母侍病二十餘年歷久不懈懇賜表揚命予旌如例士林善治獄爲巡撫守令來謁輒具獄命擬判每誡之曰深文傷和姑息養奸夫律例猶本草其情事萬端如病者之經絡虛實不善用藥者殺人不善用律者亦如之凡讞定必先極大略牌示始發繕文册吏不得因緣爲奸日治官文書至夜坐白木榻一燈煖然手批目覽雖除夕元辰弗較愛民憂國惟日不足江南民尤德

之九年請祀蘇州名宦祠鄧縣邵基臨汾王師與士林先後撫江蘇有清名基
字學陞康熙六十年進士改庶吉士雍正三年授編修考選福建道御史巡中
城止司坊官饋遺商市月椿錢釐積案奸宄惕息巡直隸順德大名廣平三府
以廉勤飭使事遷戶科給事中命在上書房行走四遷國子監祭酒立教術五
條勉生徒以正學歷右通政左僉都御史並仍兼祭酒十二年遷右副都御史
擢吏部侍郎疏言強梗風員以上官將予參劾輒先發制人往往參本未到揭
帖已至質訊虛誣按律治罪上官已被其累請嗣後上官恃勢屬員受屈仍許
直揭部科其有誣揭者於本罪外加重科斷議行尋兼翰林院掌院學士乾隆
元年充博學鴻詞閱卷官出爲江蘇巡撫二年疏言江蘇各屬江海交錯全資
水利運道官河及湖海鉅工自當發帑官修其支河汊港蓄水灌田向皆民力
疏濬近悉請官帑似非執中無弊請將運河及江河湖海專資通洩之處仍發
庫帑估修其餘河港圩岸令有司勸民以時疏濬修築庶公私兩益下部議從
之時以治賑收捐基疏爭略言天下傳皇上新政首罷捐例今爲樂善好施之

例是開捐而巧更其名也周官荒政十二未聞乞靈于貲郎上命停止戶部持不可卒行之上以基題補按察使戴永椿知府王喬林石杰皆同鄉道員李梅賓盧見曾皆同年不知避嫌嚴旨詰責基旋卒子鐸官檢討早卒孫洪賜舉人官至禮部侍郎亦有清名師字貞甫雍正八年進士以知縣發直隸十一年授元城知縣王勝疇蕪田數百畝歲有徵請除其累導民樹蕪沙壤成沃歲祿不待請而賑調清苑遷冀州知州州民被誣爲殺人已定讞民所聘女警同死廉得實覆鞠雪其枉俾完娶累遷清河道從大學士高斌等規費直隸水利周歷保定河間天津正定諸地所學畫多被采用擢直隸按察使十一年遷浙江布政使調江蘇巡撫安甯劾解任又以按察使任內失察邪教降補天津道再授浙江布政使十五年擢江蘇巡撫免沛縣昭陽湖淪地老荒麻地徵課尋卒子賈望自有傳

尹會一字元孚直隸博野人雍正二年進士分工部學習授主事選員外郎五年出爲襄陽知府漢水暴漲壞護城石堤會一督修建分榷巡功民忘其勞朔

八蜡廟表諸葛亮所居山復爲茅廬其上署荊州石首饑民聚衆揚言將劫倉穀會一單騎往諭繫其強悍者發倉穀次第散予之衆悅服九年調江南揚州知府濬新舊城市河通舟楫濬城西蜀岡下河灌田疇十一年遷兩淮鹽運使新安定書院士興於學高宗卽位就加僉都御史銜擢兩淮鹽政乾隆二年入覲命署廣東巡撫以母老辭調署河南巡撫河南方閔雨疏請緩徵並發倉平糶不拘存七糶三舊例視緩急爲多寡上從之尋疏言力田貴乘天時河南民時宜播種尙正舉耜時宜耘耔始行播種臣擬分析種植先後判諭老農督率勸勉如工本不敷許借倉穀秋後補還北方地闊一夫所耕自七八十畝至百餘畝力散工薄臣勸諭田主授田以三十畝爲率分多種之田給無田之人則游民亦少河南多鹹鹼沙地墾去三尺則鹹少而潤澤臣責成鄉保就隙地植所宜木則地無曠土河南產木棉而商賈販於江南民家有機杼者百不得一擬動公項製造給領廣勸婦女互相仿倣上諭之曰酌量而行不可欲速不可終怠若民不樂從尤不可繩以法也旋命實授三年上以河南歲稔敕籌備倉

穀會一疏言河南歲豐直隸江南歲歉商販紛集米價日昂臣飭有司本地價高於鄰縣買補鄰縣價高報明不敷銀在各屬盈餘款內均撥河南民食麥爲上高粱蕎麥豆次之臣並令參酌糴貯來春先儘糶借上嘉之四年黃河沁水共漲瀕河四十七州縣成災會一定賑恤規條十六無食者予一月之糧無居者予葺屋之資緩徵減糶留漕運貸倉米米不足移他郡之粟助之富民周濟並假餘屋以棲貧窶建棚舍安流亡免米稅興工代賑種蔓菁助民食助籽種施藥餌延諸生稽察又令離鄉求食者有司隨在廩給開以作業俟改歲東作資送還鄉御史宮煥文劾會一本年報盜百六十餘案秋審招册駁改至三十餘案疲玩貽誤上以會一忠厚謹慎非有心誤公召授左副都御史疏陳人主一言天下屬耳目今方甄別年老不勝任之員而饒州知府張鍾以年老改部屬旬日間前後頓殊羣下無所法守上嘉納之會一母年七十餘疏請終養上知會一孝母母李先以節孝旌有賢名賜詩褒之會一在官有善政必歸美於母家居設義倉置義田興義學謂皆出母意母卒會一年已逾五十居喪一遵

古禮十一年服闋召授工部侍郎督江蘇學政十二年上敕各省學政按試時以御纂四經取與舊說別異處發問答不失指者童入學生補廩會一請令生童冊報考試經解別期發問不在冊報者不概補經解下部議行會一以江南文勝風以質行嘗謁東林道南祠刻小學頒示士子處上是鏡廬墓際舜山親訪之薦於朝侍郎方苞屏居清涼山徒步造訪執弟子禮校文詳慎士林悅服十三年轉吏部仍留學政任力疾按試至松江卒遺疏請任賢納諫巡撫雅爾哈善奏准入名宦祠子嘉銓自舉人授刑部主事再遷郎中授山東濟東道再遷甘肅布政使改大理寺卿休致乾隆四十六年上巡幸保定嘉銓遣其子齋奏爲會一乞諡又請以湯斌范文程李光地顧八代張伯行及會一從祀孔子廟上責其謬妄逮至京師親鞫之坐極刑改絞死上以嘉銓自著年譜載與刑部簽商緩決並稱大學士爲相國又編本朝名臣言行錄屢降旨深斥之

王恕字中安四川銅梁人康熙六十年進士改庶吉士雍正元年吏部以員外郎缺員請以庶吉士揀補恕與焉旋自員外郎遷郎中考選廣西道御史轉兵

科給事中出爲江南江安糧道再遷廣東布政使乾隆五年署福建巡撫上諭之曰勉力務實勿粉飾外觀封疆大吏不可徒自立無過之地遂謂可保祿全身也旋奏臣到任數月官方民俗積儲兵防已得其大略漳泉素刁悍已嚴諭有司勤爲聽斷力行整刷民俗尙華靡督臣德沛以儉樸化民臣更當倡導爲助合省常平倉穀至四年歲終共存一百三十四萬又收捐監穀十五萬委道府切實察覈報聞六年奏言漳各縣最稱難治於繁缺知縣內揀選調補多以處分被駁請嗣後調臺官員雖有經徵承追各案准予題調上諭曰用此定例則不可隨本奏請則可又奏各鄉社穀向俱借存寺廟請於四鄉村鎮適中處分建倉房工費卽以社穀撥充俟將來續收補項又奏免崇安無田浮賦一千二百五十一頃及閩縣加徵無著學祖又奏福建多山田零星合計成畝嗣後民間開墾不及一畝與雖及一畝而地角山頭不相毗連者免其升科均從之實授巡撫江蘇布政使安凝條奏賑務上發各督撫察閱恕疏言救災之法有三曰賑曰糶曰借此三者實心辦理則益民奉行不善則害政以賑而論地

方有司於倉猝查報時分極貧次貧一有差等便啓弊端里甲於此酬恩恐胥役於此得上下而民之冀幸而生失望者更不待言蓋貧富易辨極次難分如以有田爲次貧無田爲極貧一遇旱澇顆粒皆無有田與無田等也如以有家爲次貧無家爲極貧則無從得食相忍守饑完聚與焚獨同也與其倉猝分別開爭競之門莫如一視同仁絕覬覦之望臣愚以爲初賑似應一律散給加賑再行分別庶杜爭端以糶而論定例石減時價一錢俾小民升斗易求牙商居奇無望誠接濟良法乃有司每多請過減倘輕聽準行勢必希圖多糶規利者雲集喧囂且米價太賤商販不前臣請嗣後平糶仍照定例斟酌辦理使災民實沾升斗之惠而棍徒囤戶難行冒濫之姦以借而論動公家之銀爲百姓謀有無通匱乏此周官恤貧遺法也然使辦理未協則官民交累假如荒年田土無力畊種有司借給籽種猶可稔時卽價若告貸銀米以給口食則必計其能還而後與之狡黠之流遂謂官有偏私不免造謗生事有司不得已略爲變通而無力還官差拘徵比民無安息是始則借不能還因爭鬭而被刑繼則還不

能清道追呼而更困名爲利民實爲病民且年久不清蒙恩豁免帑項終歸無著臣以爲與其借而無償莫如賑而不借此皆當先事而熟籌者也報聞旋以官按察使時刪改囚供下吏部召詣京師上以恕居官賢否詢閩浙總督策楞又命新任巡撫劉於義考察策楞言恕操守廉潔老成持重惟識力不能堅定於義亦言恕廉潔百姓俱稱安靜和平絕無擾累惟不能振作上謂兩奏皆至公之論尋補浙江布政使旋卒恕治事不苟初授湖北糧道押運赴淮以船戶挾私讎自請總督糾劾任江安糧道整飭漕務尤有聲充福建鄉試監臨武生邱鵬飛以五經舉第一上諭不平奏請覆試尋察出實使其弟代作吏議降調上特寬之子汝璧字鎮之乾隆三十一年進士授吏部主事累遷郎中出爲直隸順德知府調保定因承審建昌盜馬十未親鞫奪官戍軍臺尋准贖罪降授同知署直隸宣化府同知累擢大名道嘉慶四年擢山東按察使五年遷江蘇布政使六年護理巡撫旋授安徽巡撫七年請增設穎州督捕同知湖廣總督吳熊光等奏湖廣需兵米請於安徽糴十萬石上以安徽方缺兩令酌量汝璧

奏湖廣軍需事要當如數撥運請視嘉慶二年例先運六萬石如所請尋奏太湖續報成災請緩徵並劾府縣勘報遲延上以督撫查辦災賑於奏報後續行查出災區往往廻護屬吏將小民疾苦置之不問汝璧獨據實參奏因深嘉之八年召授內閣學士擢禮部侍郎旋復授安徽巡撫九年召授兵部侍郎調刑部因病請解任十一年卒汝璧兄汝嘉後汝璧六年成進士官檢討

方顯字周謨湖南巴陵人自歲貢生授湘鄉教諭稍遷廣西恭城知縣雍正四年詔諸行省舉賢能吏布政使黃叔琬以顯應超擢貴州鎮遠知府值歲饑捐俸煮粥食饑民民頌之總督鄂爾泰議開苗疆改土歸流雲南東川烏蒙鎮雄諸土府既內屬貴州苗未服貴州苗大者南曰古州曰八寨西南曰丹江東北曰九股曰清水江九股清水江界鎮遠丹江界凱里八寨界都勻古州界黎平參錯萬山中地方三千里衆數十萬恒出剽掠鄂爾泰召顯問狀顯力言宜如雲南例改土歸流問剿與撫宜孰施對曰二者宜並施第先撫後剿既剿則仍歸於撫耳因條上十六事曰別良頑審先後禁騷擾耐繁難防邀截戒姑息宥

脅從除漢奸繳軍器編戶口輕錢糧簡條約設重兵建城垣分塘汛疏河道各爲之說甚備鄂爾泰趨之檄按察使張廣泗招撫古州丹江八寨諸苗而以九股清水江諸苗屬顯六年顯自梁上進次挨磨者磨再進次柏枝坪宣諭諸苗撫定清水江生苗十六寨九股屬台拱生苗數寨冬廣泗已數定丹江顯續招清水江生苗七寨九股屬陶賴生苗十三寨施秉有盜匿台拱農二寨副將張尙謨捕不得欲屠之苗懼逃林谷將爲變顯聞之曰如此則諸苗人人自危獨馳入苗寨寨空無人顯則宿寨中翌旦張蓋出令從者繞林谷呼苗出撫諭之曰汝曹速歸寨卽良民天子必不殺良民苗感泣相率歸寨顯益宿寨中三日苗縛施秉盜以獻七年三月廣泗以清水江南岸諸寨尙懷觀望檄顯與尙謨率兵循北岸徵巡次柳羅南岸公鵝柳利雞擺尾諸寨苗渡江來攻顯督兵禦之殺數十人苗衆師寡尙謨欲引退顯不可固守待援廣泗師至圍乃解廣泗用顯議散諸寨專攻公鵝破之諸寨皆聽命鄂爾泰奏置貴東道卽以命顯仍駐兵清江顯申軍令督將士毋掠毋淫毋踐田殺苗民有來愬者爲處其曲直

乃益築城郭建官廨治礮臺營房苗民競來助役九年諸工竟顯巡行視塘汛
黔楚商船上下相接苗民皆悅服事粗定尋授顯按察使台拱者苗中扼要地
也鄂爾泰議置營於此十年巡撫張廣泗奏請顯董其事秋羊翁烏羅桃賴諸
寨苗爲亂九股諸苗附之攻台拱顯與總兵趙文英嚴爲備擊走之進破羊翁
寨苗夜至顯以兵少令人燃兩炷香手之爲火繩狀以怖苗苗走退踞排略排
略者台拱隘我師餉道所必經台拱師僅二千五百人苗數萬援兵再敗自賊
始攻或欲棄之走顯拒之及圍久糧盡宰馬以食迫冬寒衆洶洶不自保護潰
圍退保下乘顯曰台拱失古州清江諸寨皆煽動苟免失臣節撓敗損國威事
急死此耳衆感奮會總兵崔昇援至苗奪我後山樵路絕顯夜出兵奪以還苗
攻益急顯怒馬擊之衆殊死戰苗敗走乘勝拔烏孟井底二寨取米穀餉軍昇
兵亦克大關入顯率兵出夾擊苗大潰凡堅守六十九日而圍解提督哈元生
師繼至破蓮花垂悍苗九股苗復定自鄂爾泰議開貴州苗疆事發於廣泗而
策決於顯卒終始其事崎嶇前後七年而事集乾隆元年丁母憂去官三年服

除授四川布政使四年署巡撫大小金川雜谷梭磨沃日革什咱諸土司相仇殺顯遣人諭之事稍解議者欲乘此視雲南貴州例令改土歸流顯疏言雜谷梭磨吐番後裔其巢穴在唐爲雜州戶口十餘萬金川與接壤戶口不過數萬雜谷憚金川之強金川則畏雜谷之衆彼此鉗制邊境又安固不可任其爭競亦不可強其和協沿邊生番留之可爲內地捍衛從前川省調用土兵亦供餼發至其同類操戈原未擾及內地前經化誨亦尙凜遵設欲改土歸流非惟彈丸土司無裨尺寸且所給印信號紙一經追取卽成無統屬之生番稍有違抗又費經營奏入上以所見甚是褒之寢前議未行旋與總督鄂彌達提督鄭文煥疏言小金川與雜谷梭磨畫界以所侵必色多六寨歸雜谷梭磨又與沃日畫界以隴堡等三寨隸沃日美因等二寨隸小金川大金川與革什咱二土司構爭檄建昌道李學裕開諭革什咱建轉經樓訊大金川令卽燬除大金川亦歸所侵蓋古地邊外諸土司亂悉平郭羅克番爲亂走匿色利溝遣兵圍捕土酋蒙柯縱使走顯令總兵潘紹周按治奏聞上諭曰此等事汝固應就近料理

亦當與總督熟商總督黃廷桂也四川亂民號囓嚙子爲民害顯疏言四川自明末兵燹屠戮殆盡我朝勘定後各省移民來者多失業之民奸頑叢集有所謂囓嚙子結連黨羽暗藏刀斧晝夜盜劫臣嚴諭捕治並令編保甲整塘汛以清其源得旨實力奉行毋視爲虛文五年授廣西巡撫時顯方病目聞命赴新任上嘉其急公旋請回籍調理上慰留之六年顯病目未愈命太醫院選眼科馳往醫治尋以疾亟請告回里卒顯莅政明而恕文煥嘗奏顯爽直坦白政治勤敏遇事彼此悉心商榷推誠共濟上嘉文煥論甚正顯嘗奏薦學裕因及夔州知府崔景俊賦性巧滑以其悛改姑從寬恕上諭曰似此考察屬吏且有過錄長得用人之要矣桂顯子字友蘭從顯平貴州苗有功議叙父喪終以知縣發廣東補英德調潮陽以善折獄名舉卓異擢雲南昆陽知州署安甯乾隆二十年擢臨安知府署啟江調東川丁母憂服除授甘肅鞏昌知府鞏昌及平涼慶陽三府饑詔發西安藩庫銀六十萬治賑大吏檄桂任其事至平涼饑民待食急適部撥城工銀三十萬先至桂以便宜留治賑饑民賴以全三十三年遷

浙江寧紹台道故事定海戰艦九歲更造則移致寧波船廠取其值輸之官名曰折變奉檄裁戰艦桂請視時值倍之部駁坐短估成伊犛三十七年放還卒馮光裕字叔益山西代州人康熙五十年舉人雍正元年以薦授雲南大姚知縣大姚賦少而耗重積逋數萬光裕不取耗視負尤多者誶責之逋賦悉清民以耗重故輒寄大戶造偽券占田吏毀其籍光裕檢毀未盡者賊之按牒辨其偽歸田故主民尤頌之遷貴州銅仁同知赴闕引見時古州苗方亂世宗詢及之光裕對苗不可盡殺宜隨機化導令歸版圖上聽其言既行擢思州知府未任改雲南永北永北介金沙江外與四川連界苗獠窟其中有事則兩界相誘總督鄂爾泰命往勘光裕輕騎往獠從谷中出挺刃相向光裕策馬前諭以利害獠雜拜聽命各散去鄂爾泰疏請改知麗江仍兼理永北事未幾擢驛鹽道八年東川烏蒙獠叛鄂爾泰檄光裕會鎮將討平之擢按察使烏蒙俘七千人語不可通譯者而謾莫能詰光裕集羣譯於使院分室居之訊一人經數譯乃得其情獠姓名多同爲編次年貌驗決無誤省釋者甚衆廣西州民李天保以

邪教聚衆殆千人檄光裕按治光裕曰愚民茹蔬奉佛非有異志薄其罪焚籍置不問十一年擢貴州布政使十三年古州苗叛都江清江入寨丹江台拱諸新附苗皆應師討之光裕督餉令民應役厚與直行得持械自衛募熟苗爲助畀以木符戒官兵無妄殺皆躡躍應募師集十餘萬皆得宿飽軍罷民被兵者無所棲止給草舍居之賦以衣食復業者二十餘萬戶貴州賦銀八萬八千米十五萬五千光裕奏請蠲免高宗卽位命被兵地停徵三年又奏古州丹江諸苗勦除殆盡荒田空蕩遠近相望當募民居苗寨墾苗田設屯衛行保甲法授降苗所納軍器俾農隙講肄以壯聲援省餽餉得旨允行乾隆四年擢湖南巡撫鎮草紅苗叛光裕督兵捕治不三月而平疾乞假聞城步綏甯苗復勾結粵搖爲亂密咨兩廣總督籌協捕尋卒遺疏猶言二縣困於兵請免今年租上從其請子祁乾隆二年進士官編修孫廷丞舉人以廕生授光祿寺署正官至湖北按察使

楊錫紱字方來江西清江人雍正五年進士授吏部主事累遷郎中考選貴州

道御史十年授廣東肇羅道肇慶瀕海藉圍甚衛田歲親蒞修築終任無水患
乾隆元年署廣西布政使尋實授請禁州縣以土產餽上官六年授廣西巡撫
貴州土苗石金元爲亂焚永從縣治會貴州湖廣兵勦擒之旣而邊江土苗復
爲亂謀犯思恩府檄兵往捕得其渠李尙彩及其黨八十餘七年奏言廣西未
行保甲苗獍雖殊種多聚族而居原有頭人略諳事體請因其舊制寓以稽覈
苗獍狺獍各就其俗爲變通詔嘉之尋又奏言設兵以衛民乃反以累民城守
兵欺凌負販攫取薪蔬塘汛兵驅役村莊恣爲飲博臣於撫標訪察懲治請敕
封疆大臣共相釐剔得旨允行八年梧州知府戴肇名醜人發詭其名曰長生
果卻之具以聞上諭曰汝可謂不愧四知矣廣西民有逃入安南者捕得下諸
獄疏聞上命重處錫紱卽杖殺之上諭曰朕前批示令其具讞明正典刑乃錫
紱誤會卽斃杖下此皆當死罪人設使不應死者死則死者不可復生矣下部
議處九年授禮部侍郎十年授湖南巡撫奏言周禮遂人治野百里之間爲治
者一爲漁者百爲溝者萬指胥腴之地以爲溝漁誠以蓄洩有時則旱潦不爲

患所棄小所利大也後世阡陌既開溝洫雖廢然陂澤池塘尙與田畝相依近水則腹遠水則瘠湖南濱臨洞庭愚民昧于遠計往往廢水利而圍田工甚至數畝之塘培土改田一灣之澗絕流種莖彼徒狃於兩陽時若以爲無害不知偶值旱澇得不償失且溪澗之水遠近所資若截壑爲田則上溢下漫無不受累官吏以改則陞科爲勳墾之功亦復貪利忘害溝洫遂致盡廢臣以爲關係水利當以地予水而後水不爲害田亦受益請敕各省督撫凡有池塘陂澤處所嚴禁改墾上以各省米價騰貴諭各督撫體察陳奏錫紱疏言米貴由於積漸上諭謂處處積貯年年採買民間所出半入倉庾此爲米貴之一端臣生長鄉村世勤耕作見康熙間石不過二三錢雍正間需四五錢今則五六錢戶口多則需穀多價亦逐漸加增國初人經離亂俗尙樸醇數十年後漸習奢靡揭借爲常力田不給甫屆冬春農糴於市穀乃愈乏承平既久地值日高貧民賣田既賣無力復買田歸富戶十之五六富戶穀不輕售市者多而售者寡其值安得不增臣以爲生齒滋繁無可議者田歸富戶非均田不可今難以施行風

俗奢靡止可徐徐化導不能遽收其效至常平積貯當以足數賑濟而止不必過多目今養民之政尤宜專意講求水利使蓄洩有備偏災不能爲患以期產穀之多未必非補救米貴之一道也疏入上均嘉納焉丁父憂服闋十五年授刑部侍郎仍授湖南巡撫丁母憂服闋十八年仍授湖南巡撫擢左都御史十九年署吏部尙書禮部侍郎張泰開保同部侍郎鄒一桂子志伊爲國子監學錄下吏部議處議未當責錫絨曲庇下都察院議奪官命留任二十年復署湖南巡撫授禮部尙書二十一年署山東巡撫二十二年授漕運總督疏請豁興武江淮二衛旗丁欠繳漕項上責其沽名命以養廉代償二十三年疏言屯田取贖宜寬年限價百金以上許三年交價價足田卽歸船旗丁交兌不足名曰挂欠應由坐糧廳限追懲治督運官以下有一丁挂欠卽停其議叙旗丁改倉新丁但交篷桅槓索價值舊丁公私欠項不得勒新丁接受水次兌漕令倉役執斛旗丁執槩江淮興武二衛運丁運糧快丁駕船應循例並僉不得避運就快上諭曰此奏確有所見下部議從之二十五年疏言自開中河漕艘得避黃

河之險獨江北長淮等幫以在徐州交兌不能避險請令改泊阜河并丁詣徐州受兌州縣代雇剝船轉運過壩上從之尋以錫紘實心治事命免以養廉代償漕項二十六年疏言運薊州糧船自甯河轉入寶坻由白龍港劉家莊達薊州水道淤淺請責成官爲疏濬又疏言板閘臨清天津三關尙沿明制漕艘給發限單應請裁革州縣收漕如有攙雜潮潤糧道察出本管知府視徇庇劣員例議處軍丁兼充書役一體句僉頭舵水手受雇領費輒復潛逃請發邊遠充軍上諭曰所奏俱可行從之加太子少師二十八年加太子太保二十九年疏言軍民戶籍各分既隸軍籍卽應聽僉辦運乃宦家富戶百計圖避所僉皆無力窮民情理未得其平嗣後如僉報後辨訴審虛參劾治罪上諭曰錫紘此奏破駁徇之習如所議行並下部議叙又疏言糧艘例禁私鹽道經揚州總督鹽政及臣各專委督察乃又有淮揚道揚州游擊守備江都甘泉兩縣各差兵役搜查糧艘因之羸阻如江廣幫爲通漕殿後過揚州已在冬令尤爲苦累臣思事權宜歸於一請專聽總督鹽政委員督察餘悉停止上諭曰所奏是下部議

行三十年疏言駱馬湖蓄水相傳專濟江廣重運今歲幫船阻滯先開柳園隄口運河水長江浙幫遂得過行次開王家溝口江廣幫至湖水未嘗告竭每歲沂水自湖而下爲海州沭陽水患若於四五月間引湖濟運亦減海州沭陽水患一舉兩利從之三十二年卒賜祭葬諭勳錫級官漕督十二年編輯漕運全書黃登賢代爲漕督表上之自後任漕政者上輒命遵錫級舊章

潘思榘字絜方江南陽湖人雍正二年進士改庶吉士三年分刑部學習六年補主事累遷郎中八年授廣東南雄知府隸雨水溢郊野成巨浸露宿於野督吏卒治役拯溺出金瘞死贍生活民無算十三年遷海南道濬瓊州西湖深入五指山安輯黎衆勅守將之殘黎民者調糧驛道乾隆四年遷按察使懲貪鉅猾理冤獄尤多民以旱糾衆入市掠奪思榘方被疾強起坐堂皇立捕數十人杖以徇事乃定疏言廣東有狼狽黎三種狼世居茂名今附民籍讀書應試如平民狽亦輸稅歸誠設狽童義學爲訓課惟黎僻處海南崖儋萬陵水昌化感恩定安七州縣爲最多生黎居深山熟黎錯居民間相往來語言相習請於此

七州縣視孺童例設義學擇師教誨能通文義者許應試部議從之七年遷浙
江布政使八年疏言常平倉穀春發秋歛但收成有遲早俗所謂青黃不接有
司不接緩急甫春開糶牙行囤積吏胥侵漁民未嘗實惠而穀已出逾額且減
價過多迨秋成買補非存價觀望冀省耗折卽抑派爭買致昂市價請定浙東
諸府以四月浙西諸府以六月發糶價平卽止上以因時制宜許之又疏言浙
江土狹民稠全資溪湖容蓄灌溉乃民間占墾甚多如餘杭南湖會稽鑑湖上
虞夏蓋湖餘姚汝仇湖慈谿湖向稱巨浸今已彌望山疇殊妨水利嗣後墾墾
田地當責有司親勘果非官湖方准升科查勘不實嚴定處分下廷臣議行秋
金衢嚴三府被水旁溢杭湖紹三府漂流人畜無算思渠出臨江千處分賑事
蕭山民洶洶欲渡江思渠曰民饑當哺閔則亂民耳嚴治之自是無敢譁者思
渠再疏聞上諭曰今歲浙江災巡撫常安有諱災之意汝爲其難矣十一年授
安徽巡撫河決鳳陽穎泗諸府州災尤重思渠請加賑按行督察犯風渡洪澤
舟幾覆十二年疏請開濟災區略言鳳穎民習惰黷臣上年徧歷查勘方冬水

落二麥已播種而民不知澆鋤培壅所過村落林木甚稀蔬圃亦少臣令有司
審察桑麻蔬蓴凡可佐小民日食之用者隨宜試種鳳穎地分三等岡地最高
湖地稍低澗地最下澗地連大河水發難施人力湖地則外仰中低積潦爲湖
下流疏洩卽可湖出栽種岡地水雖不及而絕少溝池交秋缺雨卽患曠乾間
有傍山麓而爲陂塘如壽州安豐塘懷遠郭陂塘鳳陽六塘均應及時修築與
其因災動帑鉅萬何如平時酌動數百金陵續培治民間減荒歉多收成朝廷
亦省帑金縱遇偏災亦可以工代賑鳳穎民好轉徙豐年秋成事畢二麥已種
輒攜家外出春熟方歸遇災留一二人在家領賑餘又潛往鄰境俗謂在家領
賑爲大糧在外留養爲小糧沿途資送爲行糧至有一家領三糧者本業拋荒
人無固志應令有司嚴察流民過境實係被災方准資送藉端生事者究懲奏
入上諭曰此乃固本之事歷來無有言及此者朕甚嘉悅焉尋調福建巡撫未
行疏請安徽學田囚川義田三項視江蘇免學租例子以蠲免下軍機大臣察
議以江蘇無免學租例上責思渠沽名干譽博去後之思命出資修涿州城工

示罰十三年疏言福建自乾隆元年至十一年積欠錢糧正設法清釐民間田業授受往往不及推糶過割糶從田出既有賠糶之戶卽有無糶之田豈可使得業者任其脫漏無業者代其追比當飭有司確察務使糶歸於田十四年復疏言臣清察積欠一在屯田戶名不清一在寺田租賦不一自順治間裁併衛所名雖軍戶實係民耕乃糧冊仍列故軍姓名致難催比應令覈實更正寺田始自明季僧民相雜輒稱寺廢僧逃藉詞逋賦應令分析寺已廢者官爲經理上命實力爲之別疏言福州城外西湖爲東晉郡守嚴高所開周二十餘里蓄水溉田年久淤墊臣勸導疏濬並築隄建閘又福清郎官港法海埔俱有海灘淤地臣令築隄招墾得地二千一百餘畝上獎諭之思渠蒞政精勤叢見官屬夜披案牘旱潦必撫恤民賊以鬪訟相尙多去爲盜廉得主名飭有司捕治又以農隙巡行海防周閱戰艦朔望入書院與諸生講說經藝如是者以爲常積勞疾作不少止十七年卒上命用江蘇巡撫徐士林例祀京師賢良祠予卹視

一品賜祭葬諡敏惠

胡寶瑒字泰舒江南歙縣人父廷對管官婁縣訓導因居青浦寶瑒雍正元年舉人乾隆二年考授內閣中書充軍機處章京六年大學士查郎阿侍郎阿里袞清察黑龍江吉林烏喇開墾地畝以寶瑒從八年遷侍讀考選福建道御史是歲直隸旱上命治賑寶瑒疏言直隸被旱民多流亡請敕總督宣示上意使民靜以侍賑流民願歸耕而無力得歸者資送還里俾及時藝麥於來歲民食有益九年上命大學士訥親閱河南山東江南諸省營伍寶瑒疏言營伍積玩器械堅脆糧馬盈虧各處不一勢必聞風修整買補不肖營員或藉端苛派或坐扣月糧請敕督撫提鎮嚴飭查察十年山東江南水災寶瑒疏言方冬水涸應勸諭農民引流赴壑俾田不久浸以便春耕尤當預防蝻子諸疏皆議行十一年轉戶科給事中遷順天府府丞大學士傅恆視師金川以寶瑒從授府尹歷宗人府丞左副都御史擢兵部侍郎兼府尹如故河南民傅毓俊告張天重謀逆遣寶瑒按治毓俊服誣論如律十七年署山西巡撫十八年實授撫饑民理冤獄劾貪吏整關隘防諸政並舉尋調湖南十九年奏言郴州二州銅鉛

礦委員董理一年而代礦爲弊較代者必數月乃能明察此數月中欺蒙隱漏已自不少請做臺灣瓊州例令新舊協辦數月得旨允行二十年調江西二十一年疏言廣信銅塘山勘明無可鑿之地無可用之材無可煎之礦請永行封禁二十二年疏言豐城隄工最要石隄官修土隄民修向設里夫行之已久黠者避役貧者誤工復改爲折徵請按田均隄附漕糧徵收有田始有糧有糧始有夫圩長無從侵冒工程乃可永固均如所請行復調河南河屢決山東河南安徽諸州縣多積水上遣侍郎裘日修會諸省督撫疏治寶瓊與日修會勘疏言河南幹河有四賈魯惠濟渦河巴溝巴溝在商邱爲豐樂河在夏邑爲響河在永城爲巴河今擬疏濬加寬深以最低處爲率惠濟上游在中牟祥符諸縣下游在柘城鹿邑諸縣今亦擬加寬深以六七丈爲率賈魯自中牟以下有惠濟分流自朱仙鎮以下截沙灣塞決口拓舊隄渦河自通許青岡爲燕城河上游應加寬下游應加深鹿邑以下本已寬深當增築月隄支河應濬者商邱北沙洪溝二河爲支中之幹餘大小支河分要工次工緩工次第興修二十三年

上諭曰河南災區積困寶琮不辭勞瘁能體朕意盡力調劑以蘇窮民甚可嘉也尋加太子少傅諸工皆竟上御製中州治河碑褒寶琮曰修語並見曰修傳二十五年疏言河北諸水衛河爲大雍正間河督嵇曾筠於汲淇潞湯陰內黃諸縣建草壩二十六今已漸次淤墊臣相度疏築俾一律深通請定爲三年一小修五年一大修上可其奏是冬調江西二十六年河決楊橋復調還河南疏言賈魯惠濟二河在中牟境內逼近楊橋賈魯受黃水南徙至祥符時家岡仍入故道今已成河當將分者截之使合淺者疏之使深兩岸多挑渠港增築隄堰自成河道惠濟自兩關至岡頭橋已淤斷而岡頭橋至十里坡賈魯河不過四五里卽於十里坡建滾水壩導由岡頭橋入惠濟以分賈魯之勢而惠濟已復故道上裒爲事半功倍二十七年寶琮疾作請解任上諭曰此奏甚非朕之所望安心靜攝以慰廑念遣醫馳驛診視疏言溝渠與河道相爲表裏臣於二十三年河工告竣卽督令州縣經理溝洫每一州縣中開溝自十數道至百數十道長自里許至數十里寬自數尺至數丈皆以足資蓄洩爲度驛路通衢並

就道傍開濬雖道里絲亘而分戶承挑民易爲力自是每歲或春融或農隙隨時加濬寬深上深嘉之並令直隸總督方觀承仿行二十八年卒加太子太保兵部尚書賜祭葬諡恪靖遺疏請入籍青浦許之

論曰那蘇圖士林想思類皆以清節著而超曾寶璵又濟之以勤敏恕論救災寶璵善行水皆以民事爲急顯佐定苗疆有拊循之績錫紱督漕運所修舉似若瑣細然皆當官之急務也會一澤以道學但徵近名遂貽後嗣之禍恫哉

清史稿

列傳九十六

崔紀

喀爾吉善

字 麟文 烏魯木齊人

雅爾圖

晏斯盛

瑚寶

衛哲治

蘇昌

鶴年

吳達善

崔應階

王檢

吳士功

崔紀初名珺字南有山西永濟人年幼喪母哀毀如成人父及後母康熙五十七年成進士改庶吉士授編修遷國子監司業以母憂歸服闋補故官三遷祭酒乾隆提督順天學政雍正間採安徽學政李鳳森河南學政習窩浙江學政王蘭生條議每歲令諸生五人互結無抗糧攬訟諸生有事告州縣當先以呈詞赴學掛號爲人作證及冒認命盜案先革後審諸生毆殺人及代寫詞狀加常罪一等已斥諸生不許出境諸生欠糧必全完乃收考紀疏請罷之又

定諸生月課三次不到詳革紀請改一年諸生完糧上戶限十月中下戶限八月紀請改歲底下部議行邊倉事再邊倉場侍郎著甘肅巡撫二年移署陝西巡撫疏言陝屬平原八百餘里農率待澤於天旱則束手惟鑿井灌田實可補兩澤之缺臣居蒲州習見其利陝屬延安榆林邠邠綏德各府州地高土厚不能鑿井此外西安同州鳳翔漢中四府並渭南九州縣最低渭北二十餘州縣地較高掘地一二丈至六七丈皆可得水勸諭鑿井貧民實難勉強准將地丁羨銀借給充費分三年繳完民力况瘁與河泉自然水利不同請免以水田升科上諭曰此極應行之美舉當徐徐化導實力奉行自不能視水田升科也擢吏部侍郎仍留巡撫尋實授紀疏言陝西水利莫如龍洞渠上承涇水中受諸泉自雍正間總督岳鍾琪發帑修涇陽醴泉三原高陵諸縣資以灌溉惟未定歲修法涇漲入渠泥沙淤澗泉泛出渠石罅滲漏擬於龍洞高築石隄以納衆泉不使入涇水橋大王橋諸泉亦築壩其旁收入渠內並額定水工司啓閉均從之陝西民憚興作言紀頌樓上令詳勘地勢俯順輿情三年命與湖

北巡撫張楷互調時報新開井七萬餘上令楷察勸楷言民間食其利者三萬二千餘遇旱井效乃見民益私鑿井歲歲增廣矣紀至湖北自陳不職部議降調上諭曰紀在陝西鑿井灌田料理未善致反貽民累惟其本意爲民命從寬留任五年總督德沛劾紀以公使錢畀護糧道崔乃鏞上又聞紀以准鹽到遲令民間暫食私鹽詔紀自列紀疏辨下部議降調六年再授祭酒九年督江蘇學政以父憂歸十四年起授山東布政使以東省貧民借官穀累百萬石請視部定價石六錢收折色紓民力十五年命以副都御史銜再督江蘇學政力疾按試旋卒紀潛心理學上亦聞之再任祭酒召見命作太極圖說歷官所至以教養爲先遇事有不可輒輒然曰士君子當引君當道奈何若是

喀爾吉善字濟園伊爾根覺羅氏滿洲正黃旗人先世居瓦爾喀有赫臣者當太祖創業時來歸授牛承額眞使葉赫葉赫部長金台石使人戕之太祖滅葉赫令其子克宜福手刃其仇以祭克宜福從軍有功世職至三等阿達哈哈番克宜福子喀齊蘭官至正黃旗副都統孫凱里布官至吏部尙書皆襲世職喀

爾吉善降襲拜他喇布勒哈番授上駟院員外郎歷工部郎中兼襲世管佐領
雍正六年命借通政使留保如廣東按署巡撫阿克敦等被劾狀八年擢兵部
額外侍郎九年授侍郎十三年以驗馬不實奪官令往盛京收糧乾隆元年起
廢籍命管圓圍八旗兵丁復往盛京收糧奏禁八旗臺站官兵與朝鮮貿易
上諭曰官兵不暇貿易亦不諳貿易當令商民與互市務均平交易毋抑價毋
強索三年擢內閣學士遷戶部侍郎協理步軍統領利名事務調吏部四年命
兼管三庫五年授山西巡撫上聞山西布政使薩哈詢年政哈爾欽皆貪婪詢
喀爾吉善喀爾吉善疏劾命侍郎楊嗣瑗會鞠論如律上以喀爾吉善不卽劾
下部議奪官命寬之又劾河東鹽政白起圖貪婪白起圖疏辨命副都統塞楞
額往鞠論如律七年調安徽八年復調山東疏言山東歲饑民多流亡而鄰省
貧民亦有轉入山東覓食者請飭官吏勸各回故土以待治賑上諭曰所見甚
得體各省督撫當於平居無事時委曲開導使知敦本務實力田逢年若輕棄
其鄉本業既荒無所依倚卽國家收養資送亦不得已之舉非可恃爲長策也

又以濟南武定東昌三府遇旱濟南東昌府倉存穀緩急可相通武定無倉請撥登萊二府倉穀以濟民食九年疏言方春糧價踊貴貧民艱食請酌量減糶又言山東兵米本折兼支春季價昂支折色秋季價減支本色請春秋二季本折更換又請修德州海豐惠民樂陵城工以代賑復以濟南武定諸屬縣麥復不登令於曹沂諸府豐收之區採買接濟上皆允之直隸薊城知縣高鈞請開臨淄卽墨平陰泰安沂費滕嶧諸縣銀銅鉛鐵各礦事下喀爾吉善勅奏言東省拱衛神京地跨四府八縣形勢聯屬礦洞久經封禁未便開採利之所在衆必共趨恐濟武災區沂曹盜藪別生事端應仍封禁上亦如其請十一年遷閩浙總督崑崙生番爲亂遣兵討之奏言臺灣流民口多匪類肆竊甚或恣行不法民間謂爲圖根請令竊案再犯及圖根治罪後並遂回內地又請在臺人民迎取眷屬限一年給照過臺浙江處州總兵苗國琮請於官山種樹儲戰船桅木之用下喀爾吉善勅奏奏言令有司種樹須先糜帑且必百十年後始中繩墨日久稽察非易不若許民自種在官不費經營而巨材可獲實用從之疏

勅浙江巡撫常安貪婪命大學士訥親往鞠得實論如律詔嘉其公直加太子少保疏言甯海東湖舊與海通宋後失修飭府縣察形勢土性導士民輪資築隄撥爲世業定限升科上諭曰勸課農桑興修水利務本之圖也欣悅覽之十五年加兵部尙書銜十六年上南巡獨江南積逋二百餘萬浙省無逋賦亦特獨本年正賦三十萬製詩褒之十七年以年老乞休溫詔慰留疏言閩省產米少本歲豐稔宜爲儲備請見存倉穀不及半者令購足數已及半而本地穀賤亦以原存糶價買補上是之漳州民蔡榮祖謀亂事泄捕獲實之法與議叙十九年加太子太保上以八旗生齒日繁許在京漢軍改入民籍推行於各省喀爾吉善與福州將軍新柱疏言漢軍願爲民無問世族剛散許入民籍如別無生計坐補綠營糧缺所遺馬步甲以滿洲兵坐補二十二年秋病瘍遺囑偕其子定敏馳視賜人蔭未幾卒賜祭葬諡莊恪定長喀爾吉善子初授內閣中書遷侍讀擢江南徐州知府四遷至巡撫歷安徽廣西山西貴州諸省十八年湖廣總督永常奏請於鄰省會酌定長奏貴州與鄰省聯界苗夷環處遠行會哨

苗性多猜或滋事變請停止從之二十年題請原任黔西知州黃秉忠入祀名
宦上以秉忠爲總督廷桂父際徇市恩降旨嚴斥二十二年上南巡請入覲命
便道省喀爾吉善賜詩褒寵尋命與尙書劉統勳按雲貴總督卞文俞婪狀卽
命署雲貴總督調山西巡撫未之任丁父憂旋授副都統銜往西路軍管督屯
田事補兵部侍郎授福建巡撫遼湖廣總督二十三年卒諭部議卹署總督
高晉劾荊州副都統石亮衰庸上責定長徇庇罷卹典鄂雲布喀爾吉善係初
授筆帖式三邊工科給事中嘉慶元年授陝西漢中知府上以鄂雲布喀爾吉
善係家風具在卽擢甘肅西甯道再遷江蘇布政使護安徽巡撫旋以秋審諸
案原擬緩決刑部多改情實責鄂雲布寬縱下吏部議降調命留任尋遷貴州
巡撫年老召還鄂雲布聞命卽行上聞之不擇下吏部議奪官授筆帖式賞藍
翎侍衛充葉爾羌辦事大臣旋卒

雅爾圖蒙古鑲黃旗人雍正四年自筆帖式入資授主事分工部再遷郎中十
三年授鑲藍旗滿洲副都統乾隆元年疏言京員無養廉請將戶部餘平銀給

部院辦事官八旗參佐等員視步軍營例子空糧知所議師征準噶爾授參贊大臣三年命暫管定邊副將軍印四年召授左副都御史遵兵部侍郎河南新鄉民及伊陽教匪爲亂命往按治就授河南巡撫疏言河南多盜不逞之民陰爲之主俗謂窩家保甲甲長等畏窩家甚於官法大河以南深山遂谷民以防鳥獸爲名皆有刀械惑於邪教懷私角鬪何所不爲如梁朝鳳梁周張住等輩黨類甚多愚民易遭煽惑與其發覺後盡置諸法何如於未發覺前設法銷散文武會遣兵役搜查仍令自首免罪又言各省提鎮以下官皆有伴檔兵丁及各色工匠一營有數名虛糧卽少數名額兵請照官級核定數目不得虛佔兵額俱下部議行五年奏報捕得女教匪首一枝花命議叙尋諭河南止設河北南陽二鎮與巡撫不相統屬視山西例兼提督銜疏陳整飭營務足兵額勤差操明賞罰練技藝整軍械重兵食驗馬匹謹守望嚴約束並請以州縣民壯之半交駐防汛弁操練並戒兵民和衷不得偏袒平時試習騎射期於嫻熟俱如所請行三年疏言河南上年墜兩省城多積水臣令淺處濬深窄處開寬爲合

城受水之區通溝建閘時其蓄洩養魚植木以利民用又言河南上年被水奉命濬省城乾河涯及淮頓汝蔡各水目前二麥成熟農務正殷餘請概停開浚上從之又奏言現獲盜百餘多係鄰省人臣迭飭員弁分路訪緝出省捕盜例須赴地方官挂號盜聞而潛逃請得逕行往捕上命勉爲之六年又奏言河南界連五省西南伏生嵩山桐柏等山支幹交錯地多林木易於藏盜請每歲秋冬與聯界各省文武訂期巡察上命如所請行七年奏言開歸等處積水無妨田畝上責其掩飾尋又奏河南地平土鬆水利誠不如東南之通達開歸等處地當下游夏秋大雨澗水匯注積水未消多係鄰近黃河州縣歷來豁免錢糧於民生並無妨礙且土性鹹鹵難以種植未使一律疏洩以損田廬上諭曰實難宣洩朕不怪汝若避而爲飾辭則不可八年奏自陳懇直致被人言上諭曰汝必欲以豐年爲政效水旱漠不關心此奏殊屬客氣命來京改授鑲藍旗滿洲副都統授刑部侍郎調吏部十二年命往山西按治安邑萬泉民亂中途稱病上責其逗遛命解任尋起授內閣侍讀學士復擢兵部侍郎十三年調倉場

侍郎兼正紅旗滿洲副都統迭署戶部侍郎步軍統領十八年因疾解任三十二年卒

晏斯盛字虞際江西新喻人康熙五十九年舉鄉試第一六十年成進士改庶吉士雍正元年授檢討五年考選山西道御史鑲紅旗巡役以斯盛從騎驚突拘辱之斯盛以聞命治罪疏言各州縣立社倉原以通濟豐歉貧民借穀石收息十升如遇歉當不取其息從之九年督貴州學政遷鴻臚寺少卿乾隆元年擢安徽布政使奏言各省水旱災督撫題報應卹遵員發倉穀治賑仍於四十五日限內題明應否加賑其當免錢糧將丁銀統入地糧數算限兩月題報或分年帶徵或按分蠲免請旨遵行三年疏言安徽被災州縣倉儲不敷賑糶請留未被災州縣漕米備賑四年言江北向多遊食之人每遇歉歲輕去其鄉惟寓賑於工人必爭趨鳳陽穎州以淮水爲經廬州以巢湖爲緯六安滁泗舊有隄堰請援淮揚水利例動帑修濬皆從之七年擢山東巡撫山東有老瓜賊巡撫朱定元令汛兵巡大道斯盛疏言賊情狡獪大道巡嚴必潛移僻路或假僧

道技流伏匿村落應令州縣督佐雜分地巡察又奏邪教惑民莫如胤立教會
陽修善事此倡彼和日傳日廣大爲風教之害盡法深求株連蔓延恐生事端
請將胤教授徒爲首者如法捕治被誘者薄懲出首者免究上從其請尋以萊
州被水請暫禁米出海上諭曰此不過屬吏爲一郡一邑之說汝等封疆大吏
不可存過轍之心若無米可販百姓自不運何待汝等禁乎又言兗沂等府州
被水而江南饑民復至疏請無災州縣留養限五百人有災州縣限二三百人
上命實力料理八年調湖北巡撫九年遷戶部侍郎仍留任斯盛究心民事屢
陳救濟民食諸疏以社會保甲相爲經緯因言周禮族師遂人之法稽其實則
井田爲之經蓋就相生相養之地而行政教法令於其中是以習其事而不覺
久於其道而不變周衰管子作軌里連鄉小治而未大效秦漢隋唐龐雜無紀
宋熙寧中編閭里之戶爲保甲事本近古然亦第相保相受而未得其相生相
養之經臣前奏推廣社會之法請按堡設倉使人有所恃安土重遷保甲聯比
相爲經緯顧欲各堡一倉倉積穀三千一時既有難行而入穀之數則變通於

額賦之中別分本折稍覺紛更雖然社會保甲原有相通之理亦有兼及之勢求備誠難試行或易加意倉儲既慮貴糶妨民停止采買又慮積貯無資詳加酌劑擬請停戶部捐銀之例令各省捐監于本地交納本色以本地之穀實本地之倉備本地之用不采買而倉儲自充誠爲兼濟之道竊謂常平之積便於城未甚便於鄉城積多則責之也專而無能之吏或以爲累鄉積多則守之者衆而當社之民可以分勞且社會未有實際以倉費無所出也名有社會而倉不在社事實無倉往往然矣今捐穀多在於鄉而例又議有倉費擬請將此項捐納移入社會捐多則倉亦多取鄉保穀數而約舉之大州縣八十堡四堡一倉倉一千二百五十石總二萬五千石中小州縣以此類推儲蓄之方莫便於此方今治平日久一甲中不少良善四堡之倉輪推甲長遞管互相稽覈年清年款則社長累弊自除而官考其成隱然有上下相維之勢矣奏入上嘉納之十年進喜雨詩四章用其韻賜答京師錢貴上令廷臣議平市值下各督撫做行斯盛疏請視京師例禁民間銅鋪燬錢又令州縣每歲秋以平糶錢市穀時

設局令商民以銀平易又疏請捕私錢並禁民私剪錢緣限民間用銀二三兩以上糶米二三石以上皆不得以錢準銀下廷臣議行尋以母老請終養回籍十七年卒斯盛著楚蒙山房易經解唐鑑稱其不廢象數而無技術曲說不廢義理而無心性空談在近日易家猶爲篤實近理云

瑚寶伊爾庫勒氏滿洲鑲白旗人雍正五年武進士授三等侍衛補陝西永興堡守備八年準噶爾二萬餘犯科什圖卡倫從總兵樊廷進勦遇于尖山獲駝九十又進敗之于北山又遇于烏素達阪擊之退翌日分七隊迎戰瑚寶督兵奮擊自辰至申至科什圖殲敵無算敵聞岷崙磯瑚寶赴援乘夜來襲領先鋒轉戰雪中七晝夜奪波羅甄並白墩紅山鏡兒泉諸地得其巢六敵潰遁九年準噶爾復犯吐魯番瑚寶從廷進勦以勞賜白金三百累遷肅州鎮右營遊擊高宗卽位復累遷山西大同總兵賜孔雀翎十二年邊固原提督上諭之曰固原兵驕縱犯上不法瑚寶當加意整飭使兵知畏法漸次轉移又諭之曰固原城內外兵多民少回民過半私立掌教等名應時時體訪期杜弊端回人充標

兵應留意分別豪悍者懲黜怯弱者淘汰使營伍肅清旋疏請營兵具互結以
弓箭烏鎗技藝三項輪操冬季借支春餉次年四季扣除下部議行師征金川
調固原步兵二千瑚寶請馱載軍裝以二騾代三馬可省費三分一從之十三
年署甘肅巡撫兼辦總督奏言陝西歉收師行采買草料爲難將甘肅倉貯豆
石撥用俟兵過照買還倉上以通融協濟有益軍需溫諷嘉勉召授兵部尙書
尋署陝甘總督調湖廣又改授漕運總督坐失察盧穆生僞造奏稿事奪官仍
留任尋卒諡恭恪

衛哲治字我愚河南濟源人雍正七年以拔貢生廷試優等發江南委用初署
贛榆知縣調鹽城值蝗災設六條拊循優禮德望傾餉高年旌一義經理熒
獨譏警游惰約束過犯縣北有司河匯上游七縣水入海夏旱水弱海潮至鹹
苦不可食甚乃浸溢民田秋水盛又患河寬流緩入海不速哲治建閘立斗門
蓄洩有備斥鹵化膏腴歲有澗出地給無業民承耕田沈沒而糧未除者悉請
豁免循海築土墩九十餘潮大漁者得就墩逃溺號救命墩乾隆二年補長洲

兼攝吳縣請豁墾荒通賦十餘萬八年遷海州知州歲歉治賑全活二十萬人
流民有自山東就食者撫淮安知府十年河決陳家堡漂溺男女田廬無算哲
治遣小舟載餅餌救之躬涉風濤往來存問山東復災流民南下哲治捐俸益
以勸募葺草屋自清江浦屬魚溝以北銜接二百餘里所在給粥糜衣藥十三
年山東又災兩江總督尹繼善令哲治運賑米至臺莊上聞哲治善治賑調山
東登萊青道居數月擢布政使十四年授安徽巡撫奏言歙縣馬田地在休寧
請折徵充兩又言廣德催糧每圖有單頭數圖有經催前巡撫潘思渠改行順
莊轉有未便請得仍舊皆下部議行旋召詣京師十五年令回任上諭之曰汝
不滿朕意以一時無人故仍留汝宜奮勉改過調廣西入覲哲治具言親老不
便迎養命仍留安徽尋丁憂十八年服闋署兵部侍郎暫管戶部事復授安徽
巡撫疏建歙縣惠濟倉再調廣西二十年内擢工部尚書因病乞回籍二十一
年卒

蘇昌伊爾根覺羅氏滿洲正藍旗人滿丕子康熙五十九年自監生考取內閣

中書遷侍讀考選浙江道御史乾隆元年命巡察吉林奏言船廠軍古塔三姓
白都訥阿爾楚喀等處滿官不知律例訟案稽延累民請自京師遣官往理三
年轉禮科給事中屢擢至奉天府尹十一年奉天被水蘇昌請設廠四鄉增辦
賑官吏公費又請禁止游民往來奉天等處十四年擢廣東巡撫十六年署兩
廣總督廣西巡撫舒輅請於思陵土州沿邊種竹杜私越土目因以侵夷地
致毀蘇昌奏鎮安太平南寧等沿邊二千餘里無論種竹雜徧料理稍疏事端
轉啓請更正上責舒輅率寢其事蘇昌奏瓊州海外瘠區貧民生計艱難有
可墾荒地二百五十餘頃請招民開墾免其升科從之召來京十九年授吏部
侍郎二十四年署工部尙書授湖廣總督在籍御史孫紹基稱與按察使沈作
朋偕爲同官因以取賕蘇昌劾奏抵罪並請定回籍之員與有司交結處分蘇
昌劾湖北巡撫周琬乖張掩飾上調蘇昌兩廣命繼任總督愛必達察琬愛必
達發琬匿災徇劣吏狀奪官戍巴里坤蘇昌至廣東又劾碣石總兵王陳榮貪
竄奪官論如律加蘇昌太子太保二十九年奏言廣東產米不敷民食宜多貯

社穀以補常平不足請嗣後息穀統存州縣備賑免其變價從之調閩浙總督在兩廣薦鹽運使王燦燦以贓敗下吏議御史羅暹春因劾蘇昌際徇糊塗不堪節制海疆上曰蘇昌不能辭失察之咎節制海疆乃朕所簡用非御史所宜言蘇昌別疏劾知縣劉紹汜下刑部上以暹春與紹汜同爲江西人疑暹春劾蘇昌爲紹汜地詰責暹春改主事命蘇昌留任三十年臺灣淡水番爲亂焚燬亮莊民死者五十餘蘇昌檄按察使余文儀會臺灣總兵督兵討平之三十年入覲卒諡愨勤子富綱官雲貴總督蘇昌在兩廣有巨室橫斃人母誣其子獄久具勾決本已下蘇昌疑其冤親鞠之得實疏自劾上獎諭之實知縣於法時論稱焉

鶴年字芝仙伊爾根覺羅氏滿洲鑲藍旗人父春山康熙五十一年進士選庶吉士官至盛京兵部侍郎鶴年乾隆元年進士選庶吉士授檢討兼公中佐領三遷內閣學士十五年擢倉場侍郎以京師米貴疏請京通俸餉米先牛月支放十八年劾坐糧廳郎中綽克托剛愎自用遲延徇縱綽克托坐奪官又奏通

州南倉建自明天順間後併入中倉雍正間復分爲二與西倉分貯清白米臣見中西倉足敷收貯請裁南倉歸併中西倉從之十九年授廣東巡撫奏陳平米價嚴保甲緝竊盜案禁私鑄私雕諸事上諭曰諸凡行之以實持之以久勉之尋復疏請以化州石城官租穀碾給海安營兵米又奏海陽蔡家園土堤改築灰墻出俸倡修二十一年奏言番禺花陽春諸縣徵收兵米有所謂厨房米官眷米相傳起於明代藩府後爲旗營武職俸米凡萬二千餘石必細長潔白產少價昂甚爲民累應請禁革上嘉之調山東巡撫奏言濟寧魚臺金鄉滕嶧諸州縣積水爲災上命加意賑卹二十二年上南巡迎蹕奏言海豐地處海濱東北鄉尤低下易罹水患積年逋賦請豁免乾隆十一年至二十年舊欠並改用下則復奏濟寧等五州縣積水尙未盡涸上以江南宿虹蠶壁河南永城夏邑皆有積水命侍郎裘曰修會諸督撫籌度疏消七月擢兩廣總督奏東省水患頻仍正與裘曰修商度擬濬伊家河洩微山湖水河自韓莊迤西至江南梁旺城入運河計程七十里需銀十三四萬一切正須經理又與河臣張師載商

潞運河並及建隄事不容已懇留任督辦上諭曰覽奏具見良心然朕以無人不得不用汝汝仍遵前命十月復命以總督銜管山東巡撫事綜理工程奏言潞運河必先潞伊家河以洩積水使久淹地畝漸次涸出然後履勘估修庶工實費省請俟春暖鳩工不致有誤新運又偕師載疏言運河淤墊日甚尋常修潞非經久之策應自濟甯石佛開起北至臨清開逐一探底以深八尺爲度俾河身一體平坦上諭其言十二月伊家河工竟又奏言運河淤淺處分段築壩測量絳路多民居草土屋願售給價拆除瓦屋不願售量將絳路加寬被水民田速爲疏消俾爲種麥應修橋梁察有解江餘石應用不使估報買採上以實心經理不負任使嘉之尋卒贈太子太保兵部尙書銜祀賢良祠賜祭葬諡文勤子桂林自有傳

吳達善字兩民瓜爾佳氏滿洲正紅旗人陝西駐防乾隆元年進士授戶部主事累擢至工部侍郎鑲紅旗滿洲副都統二十年授甘肅巡撫赴巴里坤督理軍需以勞賜孔雀翎二十二年疏言軍糧自肅州運哈密至軍石需費十二三

兩凱旋官兵輜口糧製衣履請改二成本色八成折價既得隨時支用亦可稍省運費從之加太子少保二十四年代黃廷桂爲陝甘總督尋復以命楊應琚改總督銜管巡撫事奏言寧夏橫城堡河漲城圯相度水勢分別添築草塼俾大溜北注化險爲平旋以總督銜調河南巡撫奏改延津封邱胙城榮澤盧氏靈寶諸縣營制議行授雲貴總督二十七年奏言雲南貴州各鎮協營每兵千設藤牌兵百少不適用請以七成改習鳥鎗三成改習弓箭從之尋兼署雲南巡撫二十九年奏改都勻銅仁二協營制調湖廣總督兼署湖北巡撫巴陵民熊正朝僞稱縣人巡撫方顯子居省城與紳士交結乘間盜竊捕得實諸法三十一年調陝甘總督奏言木壘地廣土沃請將招集戶民編里分甲里選里長百戶選渠長鄉約保正訟獄守備審理命盜案守備驗訊巴里坤同知審解從之三十二年復調湖廣總督兼署荊州將軍命赴貴州借內閣學士富察善侍郎錢維城按巡撫良卿按察使高積營私飭法論如律三十五年兼署湖南巡撫三十六年復調陝甘總督值土爾扈特部內附上命分賚羊及皮衣

料理周妥上嘉其能以病乞解任尋卒贈太子太保祀賢良祠賜祭葬諡勤毅
崔應階字吉升湖北江夏人父相國官浙江處州鎮總兵應階應生初授順天
府通判遼西路同知雍正中擢山西汾州知府乾隆十五年授河南驛鹽道擢
安徽按察使丁母憂服闋補貴州按察使二十一年擢湖南布政使署巡撫總
督碩色勅應階子甘肅東樂知縣琇附驛寄家書應階不檢舉上特命降調二
十二年補江南常鎮揚道再遷山東布政使二十八年遷貴州巡撫調山東疏
請濬荆山橋舊河洩積水二十九年疏言武城運河東岸牛蹄窩祝官屯西岸
蔡河陂水匯注俱爲隄隔浸灌民田請各建閘啓閉均如所議三十一年疏言
各州縣民壯有名無實飭屬汰老弱選精壯改習鳥鎗與營伍無二不增糧餉
省得精壯三千三百餘名得旨嘉獎三十二年疏言武定濱海屢有水患一在
徒駭尾閘不暢一在鈎盤淤塞未開徒駭上游寬百餘丈至霑化入海處僅十
餘丈紆回曲折歸海遲延徒駭舊有漫口徑二十五里寬至四五十丈水漲賴
以宣洩若就此開濬庶歸海得以迅速又有八方泊爲衆水所匯伏秋霖雨下

游阻滯淹及民田泊東北爲古鈞盤河經一百三十餘里久成湮廢若就此開
濬引水入海則上游不致停蓄積水亦可順流而下旨如所請調福建二十三
年擢閩浙總督加太子太保三十四年勅興泉永道蔡琛貪鄙論如律調漕運
總督奏糧道專司漕務無地方之責令親押赴淮不得轉委丞倅召授刑部尙
書調左都御史四十五年以原品休致尋卒

王檢字思及山東福山人父府官太常寺卿檢雍正十一年進士改庶吉士乾
隆元年授編修大考四等休致十三年上幸闕里召試復授編修十四年授直
隸河間知府遷甘肅涼莊道以官河間有政聲卽調直隸霸昌道累擢安徽按
察使奏外任官員眷屬外定例州縣家人二十名府道以上遞加十名違者降
級定額本寬近則州縣一署幾至百人毋論招搖滋弊卽養廉亦不足供請申
明定例違數詳參又奏皖城濱臨大江歲多劫案請加重沿江乘危搶奪舊例
邊海有犯視此均得旨允行調直隸又調山西二十八年遷廣西布政使調甘
肅奏各省大計舉劾例由藩司主稿請嗣後藩司新任得援督撫例展限三月

以重考核二十九年擢湖北巡撫署湖廣總督以前巡撫愛必達請於沔陽新隄設文泉縣治地處低窪城倉庫獄俱未興工且於民情未便奏請裁撤移沔陽州同駐新隄下部議行調廣東巡撫秋審刑部進湖廣招册檢所定擬多自緩決改情實或改可矜上覈刑部九卿所改皆允諭檢秋讞大典宜詳慎持平失出入厥過維均傳旨申飭三十一年奏凡盜出洋肆劫夥黨器械招買皆自內地如果保甲嚴查豈能藏匿請嗣後洋盜案發詢明山某地出口將專管及兼轄統轄各員照保甲不實力例議處從之廣東有名竹洲艇者其製上寬下銳行駛極速海盜用以行劫追捕爲難檢令凡船皆改平底瓊州地懸海外黎人那隆等劫商勸法爲諸盜最檢親督勦捕決遣如律又以民多聚族而居置祭田名曰管租租穀饒裕每用以糾衆械鬪奏請管租自百畝以上者留供每年祭祀餘田歸本人其以租利所置按支均派俾貧民有田以資生凶徒無財以滋事上諭曰所奏意在懲凶息訟惟恐有司奉行不善族戶賢否不齊難免侵漁攘奪嗣後因恃祠產豐厚糾衆械鬪按律懲治卽以祠田如檢所請分

給族人俾凶徒知所警懼而守分善良仍得保其世業三十二年因病請假有
詔慰問旋卒子啟緒自編修官河南開歸陳許道燕緒自編修官侍講孫慶長
內閣中書官福建按察使

吳士功字惟亮河南光州人雍正十一年進士選庶吉士改吏部主事累遷郎
中考選御史奏言部院大臣簡用督撫調所屬司員以道府題補恐滋偏聽交
結諸弊請照雍正舊例停止從之御史仲永檀言密奏留中近多洩漏敕王大
臣詰問舉士功劾尙書史貽直疏以對上出士功疏戒以不悛改當重譴七年
授山東濟東泰武道丁憂服闋調直隸大名道改山東兗沂曹道屬縣饑上南
巡迎駕召對以聞爲截留糧米六十萬石賑之命士功董其事旱蝗爲災督吏
捕治晝夜巡閱未及旬蝗盡調湖南糧道巡撫阿克敦疏留調山東糧道再遷
湖北按察使二十二年謫巡撫河南饑救湖北發帑連州縣倉米運河南卽留
本年應運漕糧歸倉士功奏湖北地卑溼米難久貯請以一米改收二穀還倉
報聞遷陝西布政使護巡撫疏言宜君榆林葭州懷遠府谷神木靖邊寧遠諸

州縣先早後潦撥糶夏米麥五萬石分賑懷遠靖邊諸縣中阻黃河河冰卽難
挽運臣飭先期速運撥緩德等四州縣米二萬石協濟榆林葭州山路崎嶇臣
飭添雇騾駝速運俾民早霑實惠諭令竭力妥爲之調直隸奏請撫藩離任將
庫項有無虧空奏明新任撫蒞亦於交代限內另摺奏聞仍照例出結保題以
除挪借積弊上以所奏簡而易行命著爲例二十三年復調陝西護巡撫疏言
延安府兵米各縣運府倉弁兵赴府支領路遠費倍耗損過半請甘泉宜川延
川延長四縣本縣徵放支給又奏隴州汧陽縣跬步皆山歲徵屯豆請改折色
解司充餉俱從之擢福建巡撫二十四年奏請捕私鑄按錢數多寡治罪又奏
獲南洲盜八十餘人與總督楊廷璋疏請改定南洲塘汛又奏福建九府二州
常平缺額穀三十一萬石有奇臺灣積年平糶未買穀十五萬石有奇皆令補
足浙西歉收請撥臺灣穀十萬石聽浙商販運風汛不便先發內地沿海府縣
倉穀撥給俟臺灣穀運到還倉一轉移間無妨於閩有益於浙上嘉之二十五
年奏寄居臺灣皆閩粵濱海之民乾隆十二年復禁止移眷民多冒險偷渡內

外人民皆朝廷赤子向之在臺灣爲匪者均隻身無賴若既報墜立業必顧惜身家各思保聚有的屬在內地者請許報官給照遷徙完聚又條奏稽查濱海漁船令取船主澳甲保結出口逾期不還責成澳甲船主查報稽察攜帶多貨帆檣編字號書姓名免匪舟漏跡均從之尋以福建民多械鬪由大族欺凌小族疏請大戶恃強糾衆擬情實小戶被欺抵禦擬緩決刑部擬駁上諭曰福建械鬪最爲惡俗士功乃欲以族大族小分立科條是使械鬪者得以趨避其詞司讞者因而高下其手士功夙習沽名宜刻自提撕勿自貽伊戚二十六年廷璋劾提督馬龍圖挪用存營公項命士功嚴讞會奏龍圖借用公項已於盤查時歸補援自首例減等擬徒上以龍圖敗露後始行歸補且將登記數簿焚燬又增舞文之罪不得以自首論因究詰出何人意尋覆奏士功主政上奪士功官發巴里坤効力自贖二十七年廷璋奏閩縣民楊魁等假造敕書承襲世職投撫標効力上命巴里坤辦事大臣詰責士功並令自揣應得處分贖罪自効士功輸銀贖罪命釋回旋卒子玉綸二十六年進士自檢討累遷兵部侍郎督

福建學政復降授檢討

論曰縣政首重宜民紀督鑿井反貽怨譟喀爾吉善遂阻開曠種樹之議興利
誠不易言也雅爾圖應階治水斯盛治社倉哲治治賑才有洪纖效有巨細要
皆有益於民蘇昌劾大吏頗見風力瑚寶等亦各有建樹自古未有不盡心民
事而可以稱善治者也